

# Kukwe Mikani Tuare Juanye

## Apocalipsis

Ni ja töitikaka Jesube kädian nämane Juan käkwe tärä ne tikani. Niarakwe tärä mda mda tikani arato abko krörö: Kukwe Kuin Jesubtä Tikani Juankwe, 1 Juan, 2 Juan, 3 Juan. Juan nämane kitani ngite kä butu kädianta Patmos ye kánti angwane, niarakwe tärä ne tikani.

Jesu ara jire käkwe tärä ne tikamna Juanye. Nita jändrän tuen ño köböre, ye kwrere jire kukwe jökrä tä tikani tärä nebtä abko Jesukristo käkwe mikani tuare Juanye, amne kukwe jökrä niebare Ngöbökwé Juanye abko Juankwe kukwei nuani köböre, ye abko Jesukristo käkwe tikamna täräre ie. Käne abko, Jesukristo käkwe ja mikani tuare köböre Juanye angwane, Jesukwe kukwe tikamna täräbtä biandre nitre gätäkä Jesu käfti nünanka juta keta kükü kánti kä Asiate.

Mdakäre abko, Satana tä rüre käre Ngöbö rüere, ye abko rakadrekä ño ño Juan näire mentokwäre abko Juankwe tikani täräbtä Ngöbö amne Ngöbö Odei Jesukristo käkwe Satana btä sribikä kwekwe ganaindi kwäräbe rükadre gare metre nitre tödekaka Jesubti yeye abkokäre.

---

### Kukwe käne

**1** <sup>1</sup>Kukwe mden mden rakadikä bä jötrö abko rabadre gare nie abko Ngöbökwé mikani Jesukristo kisete mikakäre gare sribikä kwekwe ie. Akwa kukwe ye rabadre gare, abkokäre Jesukristo käkwe angele kwe juani niere ti Juan sribikä kwe neye. <sup>2</sup>Ye abko, tikwe dre dre tuaba Ngöbö kukweibtä amne Jesukristo käkwe kukwe mikani tuare ño ño tie abko tita niere metre jökrä arato. <sup>3</sup>Kukwe biani Ngöbökwé ni Ngöbö kukwei niekä neye, nebtä nire nire käkwe ñäkädre amne nire nire käkwe kukwe nuadre amne mikadre täte kwe, ni yebtä abko kä rabadi nuäre kri amne Ngöbökwé ja di biandi ie, ñobtä ñan angwane kukweta tikani tärä nebtä kebera nakenkä.

<sup>4-5</sup>Nitre gätäkä Jesu käfti kä keta kükü te kä Asiate, kräke ti Juan tä köbö kuin juen krörö: Ngöbö tä nire amne Ngöbö nämanena nire amne

arabe jatadi, erere arato üai ni kükü tä kürä gobrankrä Ngöbökwé ye ngwärekre, erere arato Jesukristo käta kukwe niere era metre Ngöböbtä amne niara aibe nükaninta nire käne amne niara tä gobrane jrei jökrä kä nebtä bti ta—niaratre käkwe ja moto mika kuin munkrä amne mun mika nüne jäme kwetre, ie ti tö.

Jesukristo käta ni tarere amne ja däríe íaninte krusobtä kwe angwane, ni tikaninte kwe, ni nämáne ngíte Ngöbö rüere ye ngániene. <sup>6</sup>Niarata gobrane nibtä. Erere arato, niarakwe ni mikani blitaka Ngöböbe ni mda mda diäre sribikäre Ngöbö niara Rün kräke, aísete ¡Kristo raba käikítaninkä kärekáre amne niara di raba kri kärekáre! Amen.

<sup>7</sup>Olo ketete munkwe.

Kristo jatadita mütabti, ye ni jökrä käkwe tuadi.

Nitre käkwe niara dákáninte bukobti, ye ara jire käkwe tuadita arato.

Ye ngwane ni kä jökräbti temen rabadi nekwetekä ja jiebti, kä rabadi ja müaire. Abko kore se. Amen.

<sup>8</sup>Ni Dánkíen Ngöbö käta niere krörö: Ti abko tarä okwä kena kädíanta alfa amne tarä okwä mrä kädíanta omega.<sup>a</sup> Ti nämánena jándrán jökrä kánenkri kena amne ti rabadi jándrán jökrä täbti mrä. Ti abko Ngöbö Di Kri Jándrán Jökrä Nuenkrä käta niere.

### Ni bá Ni Kä Nebtä Ngobo kwrere abko Juankwe tuani

<sup>9</sup>Ti abko Juan. Jesu käbti ti ne mun mräkä munkwe amne, munta ja tare nike tödekabtä Jesubti, ye kwrere tita ja tare nike arato. Erere arato, Ngöböta gobrane munbti, ye kwrere tä gobrane tibti arato amne, munta nünenkä dite jabtä tödekakäre janknu Jesubti, ye kwrere jire tita nüne arato. Ye abko, Ngöbö Kukwei kuin metre ti nämáne dírire amne kukwe kuin Jesubtä ti nämáne niere, dokwäre ti kitaba ngíte, aísete ti nämáne ngíte kä butu kädíanta Patmos ye kánti. <sup>10</sup>Angwane bati bämánte, Ngöbö Üai nämá táte tibtä angwane, ti trökri ni kukwei jaraba krikri bási drü kukwei kri kwrere tie se kwrere. <sup>11</sup>Ni kukwei ye abko käkwe nieba krörö tie:

Jándrán tuata makwe, ye erere tike jökrä taräbtä, bti nitre gätäkä Jesu käbti tä juta keta kükü te kä Asiate, ye kánti makwe juan abko krörö: juta Efeso, Esmirna, Pérgamo, Tiatira, Sardis, Filadelfia amne Laodicea ye ie makwe tarä ye juan, nieba kwe tie.

<sup>12</sup>Ye btäräbe ti rikwítateba angwane, ni nämáne blite abko tikwe tuaba angwane, oro dátebare ñotra gräre nämáne krä kükü, btä ti okwä rababa.

---

**a 1.8** *alfa amne omega.* Alfa abko tarä okwä käne alfabeto griegorebtä amne omega abko tarä okwä mrä alfabeto griegorebtä, ye kwrere Jesukristo abko nämáne käne amne niara rabadi jándrán jökrä täbti mrä.

<sup>13</sup>Akwa ñotra grä krä kükü ye ngätäite abko ni nämä iti abko bä rababa Ni Kä Nebtä Ngobo kwrere abko btä dän nga nüke mate ngotobtä temen nämä amne, korä orore abko nämä kitani ja kötäbti ta kwe, btä ti okwä rababa. <sup>14</sup>Angwane niara dokwä drüen abko ngwen bürere jökrä obeja drüen bätäninte kuin deme kä lana bä ngwen bürere, kwrere jire bä rababa tuen tie amne, nieve ngwen bürere, kwrere jire bä rababa tuen tie amne okwä abko rababa trä ngitiekä ñukwä jutra kwrere jire rababa tuen tie. <sup>15</sup>Erere arato, bronse kukwata kuin ñukwäte abko tä nebe trä ngitiekä, ye kwrere jire niara ngoto rababa tuen tie amne ñöta kite kri abko ngöta nebe juuu, ye kwrere jire niara kukwei rababa ruen kri tie. <sup>16</sup>Amne niara kise ruenkri abko te muke nämä kwä kükü rababa tuen tie. Erere arato, ngitra tu grine grine jabtä jütre kwärikwäri ye kwrere kukwe rababa betekä kadate, rababa ruen tie amne, ñänä träta ngitiekä dirare, ye kwrere jire niara ngwäre, rababa tuen tie.

<sup>17</sup>Ni ye btä ti okwä rababa kore angwane, ti rikaba ngitiekä ngwäkäre kwrere niara ngotobtä temen, akwa niarakwe ja kise ruenkri mikaba tibtä, bti nieba kwe tie:

Ma ñan rekwetaka tibtä. Ti nämänena jändrän jökrä känenkri kena amne ti rabadi jändrän jökrä täbti mrä. <sup>18</sup>Ti abko tä nüne kärekäre. Ti ne mden krütani bati, akwa ti nükaninta nire amne mtare tita nüne kärekäre. Mdakäre abko, ti bäri di kri gata yekrä, aisete tita gata dänkiene amne ti di tärä ni juankrä kärekäre Ngöbö okwä bäre mento amne ti di tärä ni diantarikrä gata ngäniene, ye bä mikakrä llabe gatakwe kä nakebtä tä ti kisete.

<sup>19</sup>Ne aisete, makwe jändrän turi, ye erere tike jökrä täräbtä. Dre tä nakenkä mtare amne dre rakadikä mtare mentokwäre, ye tike jökrä täräbtä. <sup>20</sup>Amne muke kwä kükü tä ti kise ruenkri makwe turi, erere arato ñotra grä orore krä kükü makwe turi, ye abko tä dre bä mike abko tä tiebe, aisete ñan nibi nüke gare mae, ye abko ti bike niere mae abko krörö: ñotra grä orore krä kükü, ye abko nitre gätäkä ti käbti juta keta kükü kanti kä Asiate abko bä mikata amne, muke kwä kükü ye abko angeletre ni kükü tä nitre gätäkä ti käbti juta keta kükü ngibiabtikä abko bä turi kore makwe abko nieba kwe tie.

### Tärä nitre gätäkä Jesu käbti juta Efesote kräke

**2** <sup>1</sup>Angwane angele tä nitre gätäkä ti käbti juta Efesote ngibiare, ye ie tärä tike krörö:

Ti kise ruenkri abko te muketa kwä kükü amne ñotra grä orore krä kükü, ngätäite tita dikekä die mikakäre, ti ne mden käta niere krörö: <sup>2</sup>Dre dre nuenta munkwe, ye gare jökrä tie abko krörö: Munta sribire tare krübäte Ngöbökrä, ye garera tie amne ja tare nikabtä munta nünenkä dite jabtä, ye gare tie. Mdakäre abko, ni ruäre diän diän

tä nüne Ngöbö rüere, tä kite ja Ngöbö kukwei ngwianka niere abko ben munta ja gete ñakare, akwa munkwe mikani ñäräre kuin amne nämane näin ni ngökö, ye abko munkwe gani btäre, aisete munkwe juantari, ye abko gare kuin tie arato. <sup>3</sup>Mdakäre abko, munta nünenkä dite tibtä amne munta ja tare nike kri ti dokwäre, akwa mun nebe dräre ñakare tödekabtä tibti, ye abko gare kuin tie arato, yebtä käta nebe nuäre tibtä.

<sup>4</sup>Akwa mun jatani tödeke krire tibti angwane, mun nämane ti tarere kri, ye kwrere munta ti tarere ñakare mda, ye aibe tuen blo munbtä tie. <sup>5</sup>Ne aisete mun nämane ti tarere kri kena, ye ngwenta töre jae, bti mun jata ja mäketa Ngöböbe angwane, mun nämane ti tarere kri kena, ye kwrere munkwe nuenta. Akwa munkwe ñan nuendreta kore ne ngwane, ñotra grä tä mun bä mike yete, ye ti bike denkä mento nitre gätäkä ti käbti mda mda ngätäite. Akwa munkwe ja mäkädita Ngöböbe ne ngwane, tikwe ñan ñotra grä ye diandikä mento munkän. <sup>6</sup>Akwa kukweta keteti munta nuene kuin abko nitre nicolaita käta kukwe nuene diän diän, kukwe yebtä mun mätä kri, ye abko kuin tuen tie, ñobtä ñan angwane kukwe nuenta kwetre yebtä ti mätä kri arato.

<sup>7</sup>Ye abko, nitre gätäkä ti käbti tä nüne juta keta küküte kä Asiate, ye olo tärä, aisete Ngöbö Üai tä dre niere, ye ie olo ketate kwe mikakäre täte. Angwane nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere. Ni ye ie tikwe kä biandi kri ngwäkä ni mikakrä nüne ye kwetadre angwane, rabadi nüne kärekäre kä kuin Ngöbökwete abko nieba kwe tie.

### **Tärä nitre gätäkä Jesu käbti juta Esmirnate kräke**

<sup>8</sup>Yebti nieba mda kwe tie:

Angele tä juta Esmirnate nitre gätäkä ti käbti ngibiare, ye ie tärä tike krörö:

Ti Jesukristo nämänena jändrän jökrä känenkri kena amne rabadi jändrän jökrä täbti mrä. Ti krütani akwa nükaninta nire abko käta niere krörö: <sup>9</sup>Munta ja tare nike amne mun bobre, jändrän ñakare munkwe, ye gare kuin tie, akwa jändrän Ngöbökwete tärä kabre munkwe kä käinbti sete, aisete Ngöbö ngwärekre mun jändrän bkäne kabre amne ñakare bobre era metre. Mdakäre abko, nitre ruäre tä ja israelita era metre niere abko tä ñäke blo mun rüere, ye gare kuin tie, akwa Ngöbökrä niaratre abko ñakare israelita era metre, ñobtä ñan angwane tä tödeke ñakare tibti, akwa niaratre tä gätäre Satanakrä. <sup>10</sup>Mdakäre abko, mun kebera ja tare nike tödekabtä tibti angwane, diablukwe ni juandi mun ruäre kite ngite kä teri, akwa munkwe ñan ja tare nikadi

raire. Köbö jätäbe munkwe ja tare nikadi. Mun raba ja tare nike kore angwane, munkwe nünanka dite jabtä abti mun krütadi tödekabtä tibti. Mun krütadre kore ti dokwäre, ye ngwane munkwe mun rüe ganandi. Ye ütiäre tikwe mun mikadi nüne kärekäre Ngöböbe.

<sup>11</sup>Ye abko, nitre gätäkä ti käfti tä nüne juta keta küküte kä Asiate, ye olo tärä aisete, Ngöbö Üai tä dre niere, ye ie olo ketate kwetre mikakäre täte. Nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere. Ngöbökwé kukwe ükadite ni jökrä kräke kä mrä angwane, Ngöbökwé ñan juandi ja okwä bäre mento, akwa kadi ngäbti kwe nünakäre kärekäre ben, aisete ñan krütadi bobukäre abko nieba kwe tie.

### Tärä nitre gätäkä Jesu käfti juta Pérgamote kräke

<sup>12</sup>Yebti nieba krörö kwe tie:

Angele tä juta Pérgamote nitre gätäkä ti käfti ngibiare, ye ie tärä tike krörö:

Ti Jesukristo kwe ngitra tu grine jabtä jütre kwärikwäri tä abko käta niere krörö: <sup>13</sup>Satana tä gobrane Pérgamote, käfti munta nüne, ye abko gare kuin tie. Satana tä gobrane yete, akwa mun tä tödeke kwatibe tibti, käta nünenkä dite tibtä. Juta munkwe, käfti Satana tä nüne, ye käfti ni iti tödekaka tibti kädian nämäne Antipas nämä nüne, akwa kämikani kwetre tödekabtä tibti, akwa ti rükaninte ñakare kwe. Ye näire mun nämä tödeke kwatibe tibti arato amne munkwe ti rükaninte ñakare, yebtä käta nebe nuäre tibtä.

<sup>14</sup>Akwa kukwe ruäre tä mun ngätäite yete abko ñakare dbe tuen tie abko ti bike niere munye abko krörö: Mekera Moisés näire nitre israelita käkwe ja mikadre ngite Ngöbö rüere, abkokäre jändrän kämikani ngöbö ngwarbeye abko nitre israelita käkwe kwetadre ngöbö ngwarbe mikakäre ütiäte jae amne, ja mikadre gure bati bati kwetre<sup>b</sup> abko ni iti kädian nämäne Balaam käkwe diribare kira Balaye abko erere Balakwe bä mikani nuäre nuendre nitre israelita okwäte. Mtare, ni ruäre mun käfti yete tä kukwe ye kwrere mike ütiäte jae, käta ja mike ngite kore, ye abko tuen blo tie. <sup>15</sup>Mdakäre abko, kukwe diribare kira Balaamkwe, ye kwrere arato kukwe dirita nitre nicolaitakwe abkokri ni ruäre mun käfti yete tä nekete, ye abko tuen blo tie. <sup>16</sup>Ne aisete, munkwe kukwe käme ye kita temen amne munkwe ja mäkätä Ngöböbe! Munkwe ñan nuendre kore ne ngwane, ngitra tu grine jabtä jütre kwärikwäri, kwrere jire ti kukweita betekä ti kadate, yebti ti näin rüre jökrä niaratrebe yete.

**b 2.14** ja mikadre gure bati bati kwetre. Números 25.1-2 tä blite kukwe nebtä. Nitre israelita käkwe ja mikani gure bati bati ngöbö ngwarbe mikakäre ütiäte jae.

<sup>17</sup>Ye abko, nitre gätäkä ti käbti tä nüne juta keta küküte kä Asiate, ye olo tarä aisete, Ngöbö Üai tä dre niere, ye ie olo ketate kwe. Kira Ngöbökwē mrö kädianta mana biani kwetadre nitre israelitaye nünakäre. Angwane mtare nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere abko ie mana tä ükani tiebe abko tikwe biandi kwetadre ie. Erere arato, tikwe jä ngwen bürere biandi ie nänkrä kä käinbti amne jä yebtä abko ni käi btin tädi tikani abko gare ñakare ni mda mdaye, akwa nire nire ie tikwe jä ye biandi, aibe ie ni käi btin ye rükadi gare.

### Tärä nitre gätäkä Jesu käbti juta Tiatirate kräke

<sup>18</sup>Yebti nieba krörö mda kwe tie:

Angele tä juta Tiatirate nitre gätäkä ti käbti ngibiare, ye kräke tarä tike krörö:

Ngöbö Odei okwä bä ñukwä jutra kwrere amne bronse bätäninte kuin tä nebe trä ngitiekä, kwrere jire ngoto bä ie abko käta niere krörö: <sup>19</sup>Munta dre dre nuene, ye gare jökrä tie abko krörö: Munta Ngöbö tarere amne ni mda mda tarere amne, munta tödeke kwatibe Ngöböbti amne, munta sribire kuin amne munta ja tare nike tödekabtä tibti angwane, munta nünenkä dite jabtä, ye gare kuin tie. Mdakäre abko, munkwe tödekani krire tibti angwane, mun nämane jändrän kuinkuin nuene, akwa mtare munta nuene bäri kuin, ye abko gare kuin tie arato.

<sup>20</sup>Akwa jändrän ketetibe nuenta munkwe abko tuen blo tie abko krörö: Meri tä iti mun ngätäite yete abko ja Ngöbö kukwei niekä tä niere au jabtä, ye abko tä näin dirire sribikä tikwetikwe ngökakäre, käta näin niere krörö: ja mikadre gure bati bati ngöbö ngwarbe mikakäre ütiäte jae amne mrö ngöbö ngwarbe mikakäre ütiäte abko kwetadre tä näin dirire. Meri kädian nämane Jreina Jezabel käkwe diribare kira, ye kwrere jire meri ye tä näin dirire abko munta tuemetre dirire mun ngätäite yete. Ye abko tuen ñakare dbe tie.

<sup>21</sup>Meri ye abko käkwe kukwe käme Ngöbö rüere ye kitadre temen, bti tödekadre Ngöböbti kwe, abkokäre tikwe kä bianina ie, akwa tö ja mikai gure bati bati janknu, ye abko ñan tö mikai temen arato.

<sup>22</sup>Ne aisete, ti bike mike ja ngie nuen, käkwe mikadi bren jume amne rabadi ja tare nike jänbti. Erere arato, nire nire käta niara kukwei mike täte amne tä näin ja mike gure bati bati ben, ye abko tikwe mikadi ja tare nike kri krübäte meri ye kukwei mikabtä täte, akwa kukwe käme ye kitadre temen kwetre angwane tikwe ñan mikadi ja tare nike kore. <sup>23</sup>Erere arato, nire nire tä nekete niarakri, ye abko tikwe gadikä jökrä. Yebtä abko kukwe kaibe ni jökrä töibtä abko gare jökrä tie abko rükadi gare tibtä ni jökrä gätäkä ti käbti

kä ketareketare temen ie amne, ni itire itire käkwe dre nuendre, ye erere tikwe ütiä biandi ie.

<sup>24</sup> Angwane mun mda mda tä juta Tiatirate yete arato, akwa meri dirikä blo, jiebti munta näin ñakare amne, kukwe ütiäte Satanakwe tä ükani kaibe tiebe nieta kwetre abko gare ñakare munye. Mun ye abko kötärä tikwe ñan kukwe mdara jire mikadi mda, <sup>25</sup> akwa munta tödeke metre tibti, ye kwrere munkwe nuen janknu abti ti jatadi nüketa abko ti tö niei kore munye.

<sup>26</sup> Erere arato, nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere amne nire nire käkwe ti kukwei mikadi täte, ye abko tikwe mikadi gobrane nitre nünanka kä ketareketare temen yebti. Ti Rün käkwe ja di biani gobrankrä kore tie, ye kwrere tikwe ja di biandi ietre gobrankrä. Ti abko tä gobrane krörö:

<sup>27</sup> Angwane niara käkwe gobrandi ja di kribti amne, bäsi dobro sribeta kantrare metata krito ribi jierore bti amne tä ngidiente kiakia jökrä, ye kwrere gobrandi kwe.

Salmos 2.9

<sup>28</sup> Erere arato, nitre ganainkä abko ie tikwe muke kri tä kite käin dekä biandi. <sup>29</sup> Ye abko, nitre gätäkä ti käbti tä nüne juta keta küküte kä Asiate, ye olo tärä aisete, Ngöbö Üai tä dre niere, ye ie olo ketate kwetre mikakäre täte abko nieba kwe tie.

### Tärä nitre gätäkä Jesu käbti juta Sardite kräke

**3** <sup>1</sup> Yebti nieba kwe tie: Angele tä juta Sardite nitre gätäkä ti käbti ngibiare, ye abko kräke tärä tike krörö:

Ti Jesukristo, kwe üai Ngöbökwé ni kükü amne muke kwä kükü tä abko tä niere krörö munye: Munta dre dre nuene, ye gare jökrä tie. Munta nüne kuin metre Ngöbökrä ni mda mda ngwärekrei, aisete mun tuen kuin ni mda mdaye, akwa ni krütani kwrere jire munta Ngöbö ngwärekrei, ñobtä ñan angwane munta nüne käme, käta ja mike ngite krübäte Ngöbö rüere. <sup>2</sup> Ne aisete mokrere jabti munkwe amne munta dre dre nuene, yebtä munkwe töbika kuin ja käne! Kukwe ruäre kuinkuin munta nuene, akwa kitera neme munye, ye käntarita ja dibti ja käne, tita niere munye, ñobtä ñan angwane sribi nuenta munkwe Ngöbökrä, nin munta nuene täte jökrä tuen tie. <sup>3</sup> Ne aisete, kukwe diribare munye, munkwe kani ngäbti, ye munkwe ngwianta töre jae abko jiebti mun rankwata, amne munta ja mike ngite Ngöbö rüere, ye kita temen munkwe, käkwe ja mäkätä Ngöböbe abko tita niere munye. Akwa munkwe ñan mokredre jabti ne ngwane, ni gokä rükadre ñongwane gare ñakare nie, akwa batibe tä nüke, ye kwrere batibe ti rükadi mun mike ja ngie nuen yete.

<sup>4</sup>Akwa nitre gätäkä ti käbti, ye ngätäite ni tarä ruäre juta Sardite yete abko tä nüne metre, ñan tä ja mike ngite ni mda mda kwrere, ye abko ni ngämi dän ngwen bürere kwetre mike dobrore kwrere. Ne aisete, niaratre abko käkwe dän ngwen bürere kitadi jabtä, nünabare metre amne deme bä mikakäre. Niaratre rabadi dikekä tibe dän ngwen bürere te, ñobtä ñan angwane ganainbare jökrä kwetre aisete. <sup>5</sup>Ye abko, nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere. Nitre ye käkwe dän ngwen bürere kitadi jabtä, niaratre abko metre Ngöbö ngwärekre bä mikakäre, erere nünandre kärekre Ngöböbe kwetre. Erere arato, nünandi kärekre kwetre, aisete käita tikani tarä ni nünanka kärekre Ngöböbe mikakrä gare yebtä amne tikwe ñan kä diandrekä mento. Mdakäre abko, ni ye abko ni jen tikwe, tikwe niedi ti Rün ngwärekre amne angeletre Ngöbökre ngwärekre arato. <sup>6</sup>Ye abko, nitre gätäkä ti käbti tä nüne juta keta küküte, ye olo tarä aisete, Ngöbö Üai tä dre niere, ye ie olo ketate kwe mikakäre täte abko nieba kwe tie.

#### **Tärä nitre gätäkä Jesu käbti juta Filadelfiate kräke**

<sup>7</sup>Yebti nieba kwe tie: Angele tä juta Filadelfia nitre gätäkä ti käbti ngibiare, ye ie tarä tike krörö:

Ti Jesukristo abko kuin deme amne kukwe era metre niekä. Erere arato, llabe jrei Davikwe jukwe juta Jerusalén btin ye tikakrä abko tä kisete amne, jukwe dikadre kwe angwane, ni mda ñan raba tiketa jire chi. Erere arato, jukwe tikadre kwe angwane, ni mda ñan raba diketa jire chi. Ti Jesukristo ye abko käta niere krörö munye: <sup>8</sup>Munta dre dre nuene, ye gare kuin jökrä tie. Tikwe jukwe tikani kwati mun känenkri, ye ni mda ñan raba diketa jire munkän abko tuen nete. Mun abko di ñakare bökan nünankrä tikrä, akwa munkwe ti kukwei mikani täte jökrä amne munkwe ti rükaninte ñakare. <sup>9</sup>Ye abko, nitre ruäre därebare ni israelitakri tä ja israelita niere au jabtä, akwa niaratre tödeke ñakare tibti, aisete ñakare israelita era metre Ngöbö ngwärekre. Niaratre tä ngwarbe ni ngökö amne niaratre abko Satanakwe era metre. Niaratre ye abko tikwe ngwiandi nüke ja mike bobre ngukudokwäbti mun ngotobtä temen angwane, tita mun tarere kri abko niedi kore kwetre.

<sup>10</sup>Angwane munkwe ja tare nikadre tödekabtä tibti angwane, munkwe nünandrekä dite jabtä, tikwe nieba, erere munkwe mikani täte jökrä. Ye mden kisete, Ngöbökre kukwe juandi kri ni jökrä kä nebtä nünanka Ngöbö rüere ye rüere, niaratre nuatekre ja käne angwane, nitre ye käkwe ja tare nikadi kri, akwa mun abko käkwe ti kukwei mikani täte abko ütiäre tikwe mun ngibiadi ja tare nika



ye ngäniene. <sup>11</sup>Ti abko jatadita jötrö ngwarbe, aise te munta nüne metre ti ngwäre kri, ye kwrere munkwe ja ngibia janknu, ñobtä ñan angwane munkwe nünandi kärekäre Ngöböbe abko korona kwrere, ye ni mda mda käkwe ñan diandrekäta munkän, abkokäre munkwe ja ngibia janknu. <sup>12</sup>Angwane nire nire käkwe ja tare nikadre tödekabtä tibti, akwa ti rükandrete ñakare kwe abko rüe ganainkä kwrere. Ni ye abko ürä nökan nguse Ngöbö tikwe jue ye täni ñan rabadre denkä jire, ye kwrere jire ni mda ñan rabadre ni ganainkä denkä tikän Ngöbö kanti mento. Erere arato, niara abko jen Ngöbökwé, abkokäre tikwe Ngöbö tikwe käi tikadi ni ganainkäbtä amne, juta Jerusalén btin Ngöbökwé tä kä käinbti, akwa kebera kite temen, ye käi tikadi tikwe ni ganainkäbtä niara abko nünanka juta Jerusalén btinte bä mikakäre. Angwane niara abko jen tikwe arato, ye bä mikakäre tikwe ja käi btin tikadi btä arato. <sup>13</sup>Ye abko, nitre gätäkä ti käbti tä nüne juta keta küküte, ye olo tarä aise te, Ngöbö Üai tä dre niere, ye ie olo ketate kwe mikakäre täte abko nieba kwe tie.

#### **Tärä nitre gätäkä Jesu käbti juta Laodiceate kräke**

<sup>14</sup>Yebti nieba mda kwe tie: Angele tä juta Laodiceate nitre gätäkä ti käbti ngibiare, ye kräke tarä tike krörö mda:

Jesukristo abko kä Amen, ñobtä ñan angwane niara abko käta ja kukwei mike täte metre amne niara abko kukwe era erere niekä. Jesukristo köböire jändrän jökrä namani bare Ngöböye kena. Niara ara käta niere krörö munye: <sup>15</sup>Munta dre dre nuene, ye gare kuin jökrä tie. Ni tibo abko ni tödekaka ñakare tibti kwrere amne ni ngire abko ni nüne ja di ngöi jökrä tikrä kwrere, akwa mun abko ñakare tibo amne mun ñakare ngire arato. ¡Mun ye rabadre tibo ni tödekaka ñakare tibti kwrere näre o mun rabadre ngire ni nünanka ja di ngöibti tikrä kwrere näre! <sup>16</sup>Akwa mun abko ñakare tibo amne mun ñakare ngire. Mun krube jirekäbe, aise te mun abko ni ütiäte ñakare jire kwrere, ye dokwäre abko tikwe mun yaidi jirekäbe mentokwäre.

<sup>17</sup>Mdakäre abko, mun jändrän bkäne kri, munta niere. Erere arato, munta jändrän mdei nike ñakare, aise te munta nüne kuin, munta niere. Akwa mun abko ni bobre, ngwarbe, amne jändrän bäri ütiäte Ngöbökwé ñakare munkwe amne kä iko mun okwäte, ñobtä ñan angwane kukwe era metre Ngöbökwé nüke gare ñakare munye. Erere arato, munta ja mike ngite krübäte, abtä munkwe ja gaidre, ye abko munta dikekä bütiere Ngöbö okwäbti ye kwrere abko munta gain ñakare jabtä, aise te mun abko bobre Ngöböta nütüre munbtä. <sup>18</sup>Ne aise te, mun rabadre jändrän Ngöbökwé bkäne era metre, abkokäre mun jata kökö tie. Ye abko, jändrän ütiäte kri krübäte

Ngöbökwe oro kuin kukwani ñukwäte mikakäre orore metre, kwrere tärä tikwe makrä, aisete mun jata kökö tie. Erere arato, tikwe mun mikadre metre ja ngwärekri, ye bä mikakäre dän ngwen bürere ye mun jata kökö jökrä tie, bti munkwe mun bütiekrä gaidre kri ye jue mika angwane, mun ñan rabadre dikekä bütiere mda. Mdakäre abko, kukwe Ngöbökwe ye gare ñakare munye, aisete kä iko mun okwäte kwrere, ye kräke abko mun jata kräkä kökö tie kitadre ja okwäte, ye köböire abko Ngöbö kukwei rabadi gare metre munye abko tita niere.

<sup>19</sup>Nire nire tareta tikwe abko btä tita mäträre töi diankäre. Ne aisete, munkwe ja di mikata kri kärekäre nünakäre ja di ngöibti tikrä amne, munkwe kukwe käme kita jökrä temen amne munkwe ja mäkätä Ngöböbe amne tibe. <sup>20</sup>¡Tita nete! Ti abko tä jukwebtä, käta ñäke, ye mike ñäräre. Nire nire, ie ti kukwei jaradre, käkwe ti kärädre gwä angwane, ti näin kanti nebe gwi abko ben tikwe mrödi siä kwatibe te. <sup>21</sup>Angwane tikwe ja tare nikaba, akwa tikwe Ngöbö rükanteba ñakare abti ti krütaba, aisete tikwe kukwe blo ganainbare kwäräbe jökrä, ütiäre Ngöbökwe ti mikani tākānintbe gobrane ketetibe jabe, ye kwrere nire nire käkwe ja tare nikadre, akwa ti rükandrete ñakare kwe abko rabadre kukwe blo ganaine kwäräbe jökrä arato. Nitre ye abko tikwe mikadi tākānintbe gobrane ketetibe jabe arato. <sup>22</sup>Ye abko, nitre gätäkä ti käfti tä nüne juta keta küküte, ye olo tärä aisete, Ngöbö Üai tä dre niere, ye ie olo ketate kwe mikakäre täte abko nieba kwe tie.

#### Kürä gobrankrä, bti Ngöbö nämane tākānintbe

**4** <sup>1</sup>Yebti tikwe nkraba angwane, jukwe nämä tikani kä känbti, btä ti okwä rababa. Angwane ni kukwe kri, drü kri kwrere tikwe kukwe nuaba käne, ye kwrere jire kukwe jarabata tie abko käkwe nieba krörö tie:

Jakwe kä känbti nete amne, kukwe rakadikä ño ño mda abko ti bike mike tuadre mae, nieba kwe tie.

<sup>2</sup>Ye btäräbe Ngöbö Üai rükaba täte jökrä tibtä angwane, kürä gobrankrä, yebti ni nämä tākānintbe iti gobrane kä känbti, btä ti okwä rababa. <sup>3</sup>Angwane niara bä rababa tuen trä ngitiekä tie. Jä ngwen bürere kädianta brillante, kwrere jire rababa tuen tie. Erere arato, jä bä tain trä ngitiekä, kwrere jire bä rababa tuen tie amne, kürä niara täkräre, ye bäre temen abko mrüträ nämä krati. Mrüträ ye abko rababa trä ngitiekä rerebare bäsi jä tuäre trä rerebare kädianta esmeralda, kwrere bä rababa tuen tie. <sup>4</sup>Mdakäre abko, kürä gobrankrä ye bäre ta abko kürä mdara jire nämä kwä gre bti kobkä. Kürä yebti abko nitre unbre unbre nämä tākānintbe ni gre bti nibkä. Nitre ye abko metre amne deme,

ye bä mikakrä dän bä ngwen bürere näma kitani btätre amne korona orore orore näma mikani dokwäbti, btä ti okwä rababa. <sup>5</sup>Angwane kürä gobrankrä ye kanti merabe rababa trä ngitiekä amne kä ngö rababa ruen krikri be tie. Erere arato, unsuni aibe ngö rababa ruen tie amne kürä gobrankrä ye känenkri ñotra näma jutra ngitiekä krä kükü. Ñotra krä kükü näma trä ngitiekä ye abko Ngöbö üai ni kükü, btä ti okwä rababa. <sup>6</sup>Mdakäre abko, kürä gobrankrä ye känenkri abko mren trä ngitiekä bidrio kwrere näma.

Angwane kürä gobrankrä ye bäre ta abko jändrän nire näma kräbkä. Jändrän ye abko okwä jökrä ngrabare, okwä jökrä ngwärekri amne trökri abko tikwe tuaba. <sup>7</sup>Jändrän kräbkä tikwe tuaba, ye abko krati rababa tuen lion kwrere jire tie. Krobukäre abko rababa tuen buey kwrere tie amne, krämäkäre abko ngwäre rababa tuen ni kwrere tie amne kräbkäkäre abko mü kri tä nakenkä käinta, ye kwrere jire rababa tuen tie. <sup>8</sup>Jändrän kräbkä tuaba tikwe, ye abko kratirekratire ngike krä ti rababa tuen tie amne ngike btä abko okwä rababa tuen jökrä btärikri amne terikri tie. Angwane jändrän ye abko käre dibire rare näma jadüke ñakare, näma niere krörö:

Ngöbö ni Dänkien Di Kri Jändrän Jökrä Nuenkrä, ma abko deme, deme, deme.

Ma nämanena nüne kena amne, mata nüne amne ma ara jatadi, näma niere. <sup>9-10</sup>Angwane Ngöbö näma tākānintbe gobrane kürä gobrankräbti, ye abko jändrän kräbkä ye näma käikitekä batire batire amne, näma mike ütiäte kri jae, kä näma kuin niere Ngöbö nünanka kärekäre yeye. Angwane nitre unbre unbre ni gre bti nibkä ye tä nebe ngukudokwäbti niara ngwärekri, käta korona jakwe mike temen Ngöbö ngwärekri, Ngöbökwä kä biani gobrane ietre bä mikakäre, käta niere krörö:

<sup>11</sup> Ni Dänkien Ngöbö,

ma aibe ngöräbe käikitadrekä amne

ma aibe raba mikani ütiäte amne

ma aibe di kri,

ñobtä ñan angwane makwe jändrän jökrä dätebare amne,

ma aibe köböire jändrän jökrä tä mtare,

abko nitre unbre unbre näma niere kore, rababa tuen tie.

#### Kordero abko ütiäte täräkwata mrianinkä ye metatekä

**5** <sup>1</sup>Angwane kürä gobrankrä, bti Ngöbö näma tākānintbe. Niara kise ruenkri abko täräkwata mrianinkä ketaninte näma, btä ti okwä rababa. Täräkwata ye abko näma tikani jökrä terikri amne btärikri amne, näma ketaninkä kuin bä kükü ja täritäri munkwatabti, rababa tuen tie.

<sup>2</sup>Angwane angele bäri di kri näma iti, btä ti okwä rababa amne, angele

ye kākwe ngrateba kri kākwe nieba: ¿Nire bāri ūtiāte kri abko kākwe tārākwata ne metadite amne, munkwata keta kükü mikani ja tārītāri tārākwata ketakakrā abko nirekwe diandikā tārākwatabtā amarebti ye? rababa niere kore. <sup>3</sup>Akwa kā kāinbti, kā temenbtā, amne dobo tāni abko ni kwanba ñakare jire iti tārākwata ye metatekā amne ñākākā btā. <sup>4</sup>Ni ūtiāte ñan kwanba jire iti tārākwata ye metatekā amne ñākākā tārābtā ti okwābti, yebtā abko ti rababa mūen krūbāte. <sup>5</sup>Abtā nitre unbre unbre nāma siba yete abko iti kākwe nieba tie:

Makwe ñan mūa mda, ñobtā ñan angwane ni iti Judā mrākākri abko dite kwra lion kwrere, niara abko jatani David bkūnkri amne niarakwe jāndrān jōkrā Ngōbö rüere ganainbare kwārābe, aisete niara abko bāri ūtiāte kākwe tārā se metadite amne ketaninkā bā kükü ja tārītāri se diandikā kwe arato, ni unbre ye kākwe nieba kore tie.

<sup>6</sup>Ye btārābe, Ngōbö nāma tākānintbe kūrā gobrankrābti, ye ngātāite amne jāndrān krābkā ye ngātāite amne nitre unbre unbre ni gre bti nibkā ye ngātāite ni nāma iti abko rababa tuen Kordero kwrere tie. Ni ye abko nāma nūnaninkā, akwa Kordero mūre ketani, kwrere jire rababa tuen tie. Erere arato, ni ye abko di kri, aisete niara di ye abko rababa tuen kroture krā kükü tie amne niara okwā rababa tuen kwā kükü tie, ye abko Ngōbö ūai ni kükü tā nāin kā jōkrābti temen abko tikwe tuaba. <sup>7</sup>Angwane Ngōbö nāmane tākānintbe kūrā gobrankrā yebti, ye kise ruenkri tārākwata nāma, ye ni Kordero kwrere ye kākwe dianba kisete ti okwābti. <sup>8</sup>Niarakwe tārākwata ye dianba kisete, ye btārābe jāndrān krābkā nāma yete amne nitre unbre unbre ni gre bti nibkā nāma yete, ye rikaba ngitiekā ngukudokwābti temen ni Kordero kwrere ye ngwārekri, niara mikakāre ūtiāte jae. Angwane nitre unbre unbre ye kisetekisete abko arpa nāma amne, blato kiakia orore orore ngwian nāma kisetekisete kwetre arato abko te kri ngwāri mnūne rā bāne nāma kwetre. Kri ngwāri mnū rā bāne nāma blatote kwetre, ye abko ni itire itire tōdekaka Jesubti tā nūne kuin deme Ngōbökrā kāta blite Ngōböbe abko bā nāma kore kwetre. <sup>9</sup>Angwane niaratre rababa ka btin niere krōrō ni Kordero kwrere ie:

Ma aibe ūtiāte kri, kā raba tārākwata ye den kisete amne ketaninkā munkwatabti, ye ma aibe raba denkā mento,  
ñobtā ñan angwane ma abko mūre ketani ni krāke amne,  
ja dāriebti makwe ni bātākā ngwarbe kōkanintarita Ngōbökrā.  
Ye abko, ni kukwe bātākā ngwarbe amne  
ni juta kwatirekwatire te amne  
ni nūnanka kā ketareketare temen,  
te makwe ni kōkanintarita ruāre rabakāre ni jen Ngōböke.

<sup>10</sup>Amne ma kōböire Ngōböta gobrane ni tōdekaka mabti yebti amne makwe mikani sribire ni blitaka Ngōböbe ni mda mda diāre kwrere Ngōbö nikwe krāke.

Amne niaratre kākwe gobrandi kā nebtā mabe,  
abko nieba kwe ti okwābti.

<sup>11</sup>Yebti tikwe nikrabata mda angwane, Ngöbö nāma tākānintbe kürā gobrankrābti, ye bāre temen amne jāndrān krābkā ye bāre temen, erere arato nitre unbre unbre nāma ye bāre temen angele kukwei rababa ruen kwati krübāte tie. Ye erere bkānā, angeletre nāma kwati kwati krübāte abko ni ñan rabadre tanre <sup>12</sup>amne rababa Jesu bā mike Kordero kwrere, kā rababa ngrente ja dibti, kā rababa niere:

¡Kordero ye müre ketani ni diantarikāre,

ye ütiāre abko Ngöbökwē ja di kri mikani niara kisete amne raba jāndrān jökrā bkāne!

¡Erere arato, niara aibe raba töbtā kri amne di raba jāndrān jökrā bti ta amne,

niara aibe raba mikani ütiāte jae amne

raba kākikitaninkā amne demainbare!

abko angele kukwei rababa ruen kore tie.

<sup>13</sup>Yebti jāndrān jökrā dātebare Ngöbökwē tā nūne kā kāinbti, kā temenbtā, dobo tāni amne mrente abko kukwei rababa ruen krörö tie arato:

¡Ngöböta tākānintbe gobrane kürābti amne Jesu Kordero kwrere, niaratre nibu ye aibe raba demainbare amne raba mikani ütiāte kri!

¡Erere arato, raba kākikitaninkā amne raba ja di bkāne kri kākerekāre! abko jāndrān jökrā rababa niere kore. <sup>14</sup>Angwane jāndrān krābkā nāma kürā gobrankrā bāre temen, ye abko rababa niere: ¡Jān, ye kwrere raba bare! ¡Amen! rababa niere. Angwane nitre unbre unbre ni gre bti nibkā, ye rababa jökrā ngukudokwābti temen Ngöbö amne ni Kordero kwrere ye ngwārekri, niaratre mikakāre ütiāte jae abko tikwe tuaba kore.

### Munkwata diandrekā tārābtā angwane dre dre rakadrekā

**6** <sup>1</sup>Yebti ni Kordero kwrere ye kākwe munkwata tārākwata ketakakrā keta kükü ye diankaba keteti kāne ti okwābti angwane, jāndrān krābkā nāma kürā gobrankrā bāre temen, ye krati kākwe ñākāba krikri be abko kukwei rababa ruen unsuni ngö kwrere tie abko kākwe nieba: ¡Jakwe! nieba kwe. <sup>2</sup>Ye btārābe tikwe nikraba angwane, mdā ngwen bürere nāma, btā ti okwā rababa. Angwane ni nāma nāin mdā yebti abko nāma tukwen rürā ngwena kisete amne, niarakwe rüe ganaindre ye bā mikakāre korona bianba ie, bti niara rikaba ni jökrā ganaine rübtā.

<sup>3</sup>Yebti ni Kordero kwrere ye kākwe munkwata ketebu tārākwata ketakakrā ye diankaba angwane, jāndrān nāma kürā gobrankrā bāre temen ye krobukāre kukwei jaraba tie, kākwe nieba krörö: ¡Jakwe! nieba kwe. <sup>4</sup>Ye btārābe, mdā mda jataba tuen tie. Mdā ye abko bā tain amne

ni nāma nāin bti abko kākwe kā jāme diandrekā jōkrā nikān kā nebtā amne, ni rabadre ja kāmike jōkrā kwārikwāri, abkokāre ja di bianba ie angwane, ngitra kri bianba rūkrā ie arato.

<sup>5</sup>Yebti ni Kordero kwrere kākwe munkwata tārākwata ketakakrā diankaba ketamakāre angwane, jāndrān nāma kūrā gobrankrā bāre temen ye krāmākāre kukwei jaraba tie, kākwe ꝑJakwe! nieba. Ye btārābe tikwe nikraba angwane, mdā bā drūne, btā ti okwā rababa amne, ni nāma nāin mdā yebti abko nāma jāndrān dābā nuatekrā ngwena kisete.

<sup>6</sup>Angwane jāndrān ketabkā, ye ngātāite Ngōbō kukwei jaraba krōrō tie:

Makwe mrō gaka kā jōkrābtī temen. Yebtā abko ngwian ganaindre kōbōiti abko biandre jōkrā trigo kilo kratibe btā. Erere arato, ngwian ganaindre kōbōiti abko bti sebada kōkadre kilo krāmābe jōkrā, akwa olibo kōi amne uba dōi,<sup>c</sup> ye abko makwe nān juan ngwarbe jire chi, nieba kore kwe abko jaraba tie.

<sup>7</sup>Yebti ni Kordero kwrere ye kākwe munkwata tārākwata ketakakrā diankaba bābkākāre angwane, jāndrān nāma kūrā gobrankrā bāre temen, ye abko krābkākāre kākwe ꝑJakwe! nieba. <sup>8</sup>Ye btārābe tikwe nikraba angwane, mdā bā ngwen būrere nita kite krūte bāta nebe kwrere, btā ti okwā rababa. Mdā yebti abko ni kādekata Gata nāma nāin amne Gata jiebti abko ni kā nakebtā ngibiabtikā nāma nāin, ni kāmikani Gatakwe ngwiandre ja tare nike kā nakebtā abkokāre. Ngōbōkwe kōbō biani ietre ni kāmikakrā krōrō: Nita nūne kā ketareketare temen abko tā nākanintbe ketabkā ye abko kāmikadre keteti rūbtā. Erere arato ni krūtadre mrō miare, bren kisete amne kwra krūbātekrūbāte kākwe ni ye kāmikadre abko erere Ngōbōkwe kōbōi biani ietre.

<sup>9</sup>Yebti ni Kordero kwrere ye kākwe munkwata tārākwata ketakakrā diankaba bāriekāre angwane, nitre Ngōbō kukwei mikaka gare kākwe nūnankabare dite Jesubtā amne niara rūkaninte nākare kwetre abtā kāmikani abko ūai nāma nūkwā grā tāni, sribi kwekwe Ngōbōkrā nāmāne dbe krāke bā mikakrā, btā ti okwā rababa. <sup>10</sup>Angwane niaratre ūai nāma nāke ja dibti krōrō:

Ngōbō, ma abko Gobranka jāndrān jōkrābtī amne ma deme amne ma abko kukwe era niekā kāre. Nitre nūnanka ma rūere kā temenbtā kākwe nun kāmikani tōdekabtā Jesubti, ye abko ꝑngwane kukwe ūkadite krāke, kākwe mikadi ja ngie nuen nun dokwāre amarebti ye? nāma niere kore. <sup>11</sup>Angwane dān bā ngwen būrere bianba ietre, niaratre abko metre Ngōbō ngwārekri bā mikakāre. Kukwe ūkarete nitre niaratre kāmikaka krāke, ye abko ngibiadre ken kwetre abti niaratre mrākā sribikā

**c 6.6** *olibo kōi amne uba dōi.* Mrō mda mda nāmāne krūte jōkrā angwane olibo kōi amne uba dōi aibe nāmāne angwane yebti rabadre nūne, aisete mrō jōkrā ngātāite ye abko bāri ūtiāte nūnankrā.

Ngöbökrä mda mda kämikadre täte jökrä abko rabadre jökrä ketetibe bentre angwane, Ngöbökwé kukwe ükadite niaratre rüekrä, käkwe rüe mikadi ja ngie nuen niaratre dokwäre, nieba kwe ietre.

<sup>12</sup>Yebti ni Kordero kwrere ye käkwe munkwata täräkwatera ketakakrä diankaba bä tikäre angwane, tikwe mikaba nãräre angwane, dobo rababa nakaenkä kri krübäte kä temenbtä, rababa tuen tie amne nãnä abko bä rikwitaba iko jökrä. Bäsi dän drüne, ye kwrere jire nãnä bä rababa. Sö abko bä rikwitaba tain büriere däri kwrere rababa tuen tie. <sup>13</sup>Angwane kri ngwäkä kädekata higo abko tä kite tain mrä abko müreta kite mate ribi käta münente jökrä higo kriebtä, ye kwrere jire muke rababa betekä timontimon kä temen nebtä rababa tuen tie. <sup>14</sup>Angwane täräkwatera mriakata, ye kwrere jire kä käinbti se rikaba nibrenkä, nibrenkä, nibrenkä angwane, nãnan rababa mda rababa tuen tie amne, Ngöbökwé kä tokwä krikri amne kä butu mrente mrente diankaba jökrä mento arato, rababa tuen tie.

<sup>15</sup>Angwane nitre jreire kä nebtä gitiaba jökrä kä mkäte amne jäkwata mkäte ngitiobti Ngöbö ngäniene. Erere arato, nitre gobranka krikri amne nitre rükä dänkien amne ni jändrän bkänkä krikri amne ni ütiäte krikri, btä nitre klaboré amne nitre ñakare klaboré nünanka Ngöbö rüere gitiaba jire jökrä kä mkäte jrei ben gwaire Ngöbö ngäniene, <sup>16</sup>kä rababa niere krörö ngitioye amne jäkwataye: Ngöböta tãkãnintbe kürä gobrankrãbti amne ni Kordero kwrere mätä kri, se ngäniene nun üke ja täni amne jakwe nunbti temen, <sup>17</sup>ñobtä nãnan angwane Ngöbökwé ni mikadre ja ngie nuen kri krübäte abko käi nura, ¿se abko nirekwe nünandrekä jäbtä Ngöböbe se? nitre nünanka Ngöbö rüere rababa niere kore ti okwãbti.

### Ngöbökwé ni jen kwe ngibiadi jenena jakrä

**7** <sup>1</sup>Yebti angele nãma nibkä, btä ti okwä rababa mda. Angele nãma iti kä driri, iti nindrini, iti ngwitäräkri amne iti mötarikri. Angwane müre nãnan rabadre mate mda kä nebtä, mrenbtä amne kriebtä, abkokäre niaratre nãma müre ketebtä. <sup>2</sup>Ye btäräbe angele mdara jire nãma kä driri jataba arato abko Ngöbö nire käi nãma tikani jäbtä abko ngwian nãma kisete kwe. Angele ye rükaba angwane, angele nibkä ie Ngöbökwé ja di biani kä juankrä ngwarbe amne mren juankrä ngwarbe mürebtí, yebti angele rükaba mrä käkwe ngrateba kri ja dibti, käkwe nieba krörö:

<sup>3</sup>Nitre sribikä Ngöbö nikwe kräke, ye okobtä Ngöbö käi ketaka ngämi ngibiakäre Ngöbö mätä kri ye ngäniene, ye känenkri munkwe nãnan kä temen ye juan ngwarbe. Erere arato, munkwe nãnan mren amne kri juan ngwarbe mürebtí, nieba kwe ietre ti okwãbti.

<sup>4</sup>Angwane nitre israelita nibe btä Ngöbö käi ketadrekä ngibiakäre kukwe taretare ngäniene nieba jökrä abko 144,000 abko ni kukwei jaraba kore tie.

- 5 Nitre därebare juta Judákri btä Ngöbö käi ketakaba abko 12,000.  
Nitre därebare juta Rubénkri abko 12,000,  
juta Gakri abko 12,000.
- 6 Juta Aserikri abko 12,000,  
juta Neftalíkri abko 12,000,  
juta Manasékri abko 12,000.
- 7 Juta Simeónkri abko 12,000,  
juta Levíkri abko 12,000,  
juta Isacarekri abko 12,000.
- 8 Juta Zabulónkri abko 12,000,  
juta Josékri abko 12,000,  
juta Benjamínkri abko 12,000 arato.

**Ni kwati dän ngwen bürere kitani btä kákwe Ngöbö käikitaninkä**

9 Yebti tikwe nikraba angwane, ni kä jökräbti temen nämä kwati, btä ti okwä rababa. Ni bätäkä ngwarbe amne ni kukwe bätäkä ngwarbe nämä, erere arato ni nünanka juta bätäkä ngwarbe, ye nämä kwati kwati krübäte nünaninkä kürä gobrankrä Ngöbökwé ken amne ni Kordero kwrere ye ngwärekri, btä ti okwä rababa. Nitre rababa kwati krübäte, aisete ñan rababa tanre jire chi. Nitre ye abko ngite ñakare mda Ngöbökwé niebare btätre, ye bä mikakrä abko dän bä ngwen bürere bürere te nämä näin amne nämä datile kriekä<sup>d</sup> ngwena kisetekisete kä ngwiankäre nuäre jabtä. <sup>10</sup> Angwane rababa ngrente ja dibti, kä rababa niere krörö:

¡Ngöböta tákänintbe kürä gobrankräbti amne ni Kordero kwrere, ye aibe köböire nita nebe dianintari jökrä!

rababa niere kore.

<sup>11</sup> Angwane kürä gobrankrä bti Ngöbö nämä tákänintbe ye bäre temen, nitre unbre unbre bäre temen btä jändrän kräbkä ye bäre temen angeletre nämä nünaninkä jökrä, kákwe ja okokrä mikaba neme dobobtä temen, kákwe Ngöbö käikitakaba, <sup>12</sup> krörö:

¡Amen!

Ni jökrä raba Ngöbö demaine amne käikitekä amne, Ngöbö aibe töbtä kri amne ni jökrä raba kuin niere kärekäre ie.

Erere arato, Ngöbö aibe mika ütiäte jae amne niara aibe di kri jändrän jökrä bti ta.

Ye aisete Ngöbö nikwe ye aibe abko mika ütiäte kri kärekäre ni jökräkwe. Abko kore se.

¡Amen!

**d 7.9 datile kriekä.** Datile krie abko dba krie kwrere, akwa tukwä ñakare btä amne ngwä abko mane amne bänänte, aisete kuin kwetadre.



abko angeletre rababa niere kore.

<sup>13</sup>Ye btäräbe nitre unbre unbre iti käkwe nieba krörö tie:

¿Nitre dän ngwen bürere ngwen bürere kitani jabtä, se abko nire amarebti se? Mdakäre abko, ¿niaratre kä mdenbo tä näin ruen? nieba kwe tie.

<sup>14</sup>Angwane tikwe nieba mda ie:

Ne abko. Niaratre garera mae ti mräkä, aisete makwe nie tie, tikwe nieba ie.

Abtä niarakwe nieba krörö mda tie:

Ja tare nikani kri tödekabtä Jesubti angwane, nitre se käkwe ja tare nikani arato, akwa krütani tödekabtä bti abko mden se. Angwane dän bätäteta kuin tä nebe ngwen bürere, ye kwrere niaratre käkwe tödekani Jesubti angwane, ja bätäninte ni Kordero kwrere däriete kwetre angwane, Ngöbökwe niaratre ngite dianinkä mento btä abko dän ngwen bürere bürere bä mikata btä mtare.

<sup>15</sup>Ye mden kisete kürä gobrankrä Ngöbökwe, bti Ngöböta tākänintbe gobrane abko kánti niaratre tä sribire Ngöbökrä dibire rare mtare. Ngöbökwe niaratre ngibiadi kärekäre.

<sup>16</sup>Ye kánti ñan mrö nikadre mda kwetre amne ja tare nikadi ñakare mda kwetre tomna miare.

Erere arato, ñänänkwe ñan kukwadre jire chi mda amne kä ngire käkwe ñan nikadre jire chi mda,

<sup>17</sup>ñobtä ñan angwane ni Kordero kwrere tä kürä gobrankrä Ngöbökwe kánti abko käkwe niaratre ngibiadi.

Nitre obeja ngibiaka tä obeja ngibiare, ye kwrere ngibiadi kwe. Angwane ñö ni mikaka nüne kärekäre, ye kánti näin niaratre ngwena ñö tuen jae.

Amne kukwe taretare btä tätre müen, ye ñan rabadi jire chi mda amne Ngöbökwe okwä ñöi rötadi jökrä ietre, abko nieba kore kwe tie.

### Tärä ketaninkä bä kükükäre amne blato orore

**8** <sup>1</sup>Yebti ni Kordero kwrere käkwe munkwata täräkwa ketakakrä diankaba bä kükükäre angwane, ñänä okwä ötare näre kä rababa kwekbe kä käinbti sete.

<sup>2</sup>Yebti tikwe nikraba angwane, angele nämä nūnaninkä ni kükü Ngöbö ngwärecri, btä ti okwä rababa angwane, angeletre ye abko ie drü bianba krä kükü. <sup>3</sup>Bti angele mdara jire jataba. Angele ye abko nämä blato chi orore kri ngwäri mnü rä bäne kukwakrä ye ngwena kisete abko rükaba ñukwä grä ye kánti, rababa nūnaninkä. Ye btäräbe, kri ngwäri mnü rä bäne bäne bianba kabre kukwadre ñukwä grä ororebti kürä gobrankrä Ngöbökwe ye kánti amne, juta deme Ngöbökwe käkwe kukwe ribeba

Ngöböye ye ben gwaire. <sup>4</sup>Angele rababa kri ngwäri mnü rä bäne kukwe ye ngübü rababa niken angele ye kisete kukwäne nebe Ngöbö ngwärecri, juta deme Ngöbökwé namani blite Ngöböbe abko bä mikaba kore.

<sup>5</sup>Angwane angele rikaba ñukwä grä kánti, kákwe ñukwä bda diankaba, mikaba blato orore kri ngwäri mnü rä bäne kukwakrä te kwe, bti ñukwä bda ye kitaba kä temen nebtä kwe. Ye btäräbe unsuni ngö rababa krikri be. Erere arato, kä ngö rababa ruen krikri, mera trä rababa amne dobo rababa nakaenkä se kwrere.

### Drü jükani krä kükü ja täritäri

<sup>6</sup>Angwane angeletre ni kükü ye abko kákwe ja mikani juto biare drü krä kükü ye jükakäre. <sup>7</sup>Ye erere bkänä, angele iti kákwe drü jükaba käne, ye btäräbe ñü bürere jä kukwän kwrerekwrere amne ñukwä jutra mritani däribe mni mni abko Ngöbökwé juanba kä temen nebtä, ye abko käta ñäkänintbe ketamä abko kukwaba keteti jire temen. Erere arato, kri krikri kukwaba keteti jire, akwa mikä rerebare kukwaba jire jökrä kwe.

<sup>8</sup>Yehti angele nibukäre kákwe drü mda jükaba angwane, jändrän bäsi ngitio kri jutra ngitiekä jökrä, kwrere jire kitaba mrente angwane, mrenta ñäkänintbe ketamä abko keteti rikwitaba därire. <sup>9</sup>Angwane jändrän jökrä nünanka mrente rabadre ñäkänintbe ketamä abko gataba keteti näre. Erere arato, ru mrente ñäkänintbe ketamä abko juanba ngwarbe keteti näre.

<sup>10</sup>Yehti angele nimäkäre kákwe drü jükaba. Ye btäräbe muke kri jutra ngitiekä ñotra kwrere näma kä käinbti, betakaba timon abko rikaba mate ñö krikri amne ñö kiakia ketamä abko keteti te rikaba mate. <sup>11</sup>Muke ye abko kädian näma Kwaka abko rikaba mate ñöte, ñöbtä ñan angwane ñöta ñäkänintbe ketamä abko keteti rikwitaba kwaka jökrä. Ñö kwaka, ye kisete ni krütaba kwati krübäte ñö ye ñabtä.

<sup>12</sup>Yehti angele nibkäkäre kákwe drü jükaba angwane, käta ñäkänintbe ketamä ñänänte amne söte abko keteti rikaba ngwarbe amne muketa ñäkänintbe ketamä abko keteti rikaba ngwarbe arato. Ne aisete, kä keteti näre ñänänte amne söte abko rikwitaba iko jökrä amne muke keteti näre rababa iko arato. Ye mden kisete, ñänä okwä krä kwä kä ngwenbti kä trä rababa ñakare. Erere arato, ñänä okwä krä kwä deo kä trä rababa ñakare arato.

<sup>13</sup>Yehti tikwe nikraba angwane, mü kri näma nikenkä käinta abko ngö jaraba tie amne mü ye rababa ñäke ja dibti, kä rababa niere krörö: ¡Aingwaree, nitre nünanka Ngöbö rüere kä temenbtä abko bobre jakän, ñöbtä ñan angwane angele nimä mda kebera drü jüke ja täritäri aisete! rababa niere kore.

**9** <sup>1</sup>Yehti angele nirikekäre kákwe drü jükaba angwane, angele bä muke kwrere näma kä käinbti betaninkära timon nüke kä temen

nebtä abko tikwe tuaba. Angwane kä mkä kri kädianta Kä Timonbti kräke llabe bianba ie jukwe Kä Timonbti ye tikakrä. <sup>2</sup>Ye erere bkänä, angele ye käkwe jukwe tikaba Kä Timonbti angwane, ngübü tä nebe neen krikri be, ye kwrere jire ngübü rababa kite kabre kukwane abko käkwe ñänä trä mikaba diore amne kä käinta rababa diore ngübü kisete arato. <sup>3</sup>Angwane ngübü yete abko tröda jataba kwati krübäte mda abko rikaba kä jökräbti temen kä nebtä. Tröda ye abko ie kä bianba ni tākātekāre bäsi dribe kwrere. <sup>4</sup>Tröda ye abko käkwe ñan mikä kwetadre amne kri mu jökrä rerebare ñan kwetadre kwetre. Erere arato, kri jökrä ñan kwetadre jire chi kwetre, nieba Ngöbökwē ietre; akwa nire nire tödekaka ñakare Jesubti, aisete Ngöbö kä ñakare ketaninkä okokrä btä, ni ye kwrerekwrere aibe mikadre bren kwetre, nieba Ngöbökwē ietre. <sup>5</sup>Akwa tröda ye abko ie Ngöbökwē kä bianba ni mikakrä bren jume jirekābe, akwa kä bianba ñakare kwe ietre ni kämikakrä. Angwane dribe tä ni tākete abko tä nebe tare krübäte nie, ye kwrere tröda ye käkwe nitre ye mikadre bren, käkwe ja tare nikadre krübäte sö krärike, Ngöbökwē nieba ietre. <sup>6</sup>Ne aisete nitre rababa ja tare nike tröda kisete, ni ye abko tö rabadi krütai jötrö, akwa rabadi krüte ñakare.

<sup>7</sup>Angwane tröda nitre mikaka bren ye abko bä krörö: mdä mikata biare ngwiandre rübtä, ye kwrere jire bä rababa amne, dokwäbti bäsi korona orore kwrerekwrere näma angwane, ngwäre bä rababa ni ngwäre kwrere. <sup>8</sup>Mdakäre abko, dokwä drüen rababa tuen nga meri dokwä drüen kwrere tie amne tu rababa tuen kri krübäte lion tu kwrerekwrere. <sup>9</sup>Amne jändrän ribi ribi jiero kwrerekwrere näma mikani mäträbtä ngibiakäre rüe ngäniene amne, kareta krati krübäte jākāta niken mdäkwe rübtä ngöta nebe krikri, ye kwrere jire tröda ye ngike ngö rababa ruen nikenkä käinta. <sup>10</sup>Erere arato, tröda ye abko niretu aibe rababa tuen kübarate dribe kübara kwrerekwrere. Tröda kübara ye abko di rababa ni mikakrä bren jume sö krärike. <sup>11</sup>Angwane üai käme tä dänkiene Kä Timonbti abko tä tröda ye dänkiene. Üai käme tröda dänkiene ye abko kädianta Abadón hebreore amne Apolión griegore. Ye abko Ni Gakaka nieta.

<sup>12</sup>Kukwe tare kri krübäte jatadre ketamä niebare mü krikwe abko erere tröda ye köböite kukwe tare rikaba bati käne ta, akwa kukwe tare kri tä ketebu mda.

<sup>13</sup>Yebti angele ni tikäre käkwe drü jükaba angwane, ñukwä grä orore kri ngwäri rä bäne kukwakrä Ngöböye näma Ngöbö ngwärekri, yebtä jändrän kroture kräbkä näma abko te ni kukwei jaraba tie. <sup>14</sup>Angwane angele ni ti kisete drü näma, ye ie ni kukwei käkwe nieba krörö: Angele nibkä tä mäkaninte Nö Eufrates kanti ye tikete, nieba kwe. <sup>15</sup>Ye erere bkänä, ñänä okwä nuäi, köbö mden te amne sö mdenbtä amne kä mdenbtä angele nibkä ye rabadre tikaninte abko näma mikanintbe, ye

erere angele rababa tikaninte abko käkwe ni kämikadre ketamä temen, abkokäre rababa tikaninte. <sup>16</sup>Angwane nitre rükä nämä näin mdäbti mdäbti abko 200,000,000 nieba kore abko ni kukwei jaraba tie.

<sup>17</sup>Ye ngwane abko, bäsi köböre kwrere Ngöbökwé mdä mikaba tuare tie angwane, nitre nämä näin mdä yebti abko jändrän ribi ribi nämä mikani ja mäträbti kwetre ja ngibiakäre rüe ngäniene. Jändrän ye abko bä rababa tain ñukwä jutra kwrere, bä mire drüne amne bä nämä sübrüre asufre kwrere abko nämä kitani jabtä kwetre. Mdakäre abko, lion krübäte dokwä, ye kwrere jire mdä ye dokwä rababa tuen tie angwane, mdä ye kadate abko ñukwä jutra, ngübü amne asufre rababa betekä. <sup>18</sup>Ñukwä jutra, ngübü amne asufre rababa betekä mdä kadate ye abko käkwe ni ketamä kä temen nebtä nünanka Ngöbö rüere kämikaba, <sup>19</sup>ñobtä ñan angwane mdä ye abko di rababa kadate amne kübarate ni kämikakrä. Mdä ye abko kübara rababa tbi kwrere abko bti rababa ni kwete amne rababa ni kämike arato.

<sup>20</sup>Akwa ni mda mda rababa nire ja tare nika ye näire abko käkwe kukwe kämekäme Ngöbö rüere ye kitaba ñakare temen, aiseté nämä ja mike ngite janknu abko krörö: üai käme gibiakaba ñakare kwetre. Mdakäre abko oro, plata, bronse, jä amne kri sribebare ngöbö ngwarbere abko ie kä tuen ñakare amne ni kukwei ruen ñakare ie amne dikekä ñakare abko mikaba ütiäte janknu kwetre arato. <sup>21</sup>Mdakäre abko, nitre ye nämä ni kämike, ye erere tä nuene janknu amne, kwra neme ñakare ietre amne, ja mika gure bati bati neme ñakare ietre amne tä gore janknu arato.

### Angele käkwe täräkwata chi biani Juanye

**10** <sup>1</sup>Yebti angele mda bäri dite jatata kä käinbti timonkwäre mütate, btä ti okwä rababa. Angwane angele ye abko dokwäbti käinta mrüträ nämä amne, ngwäre abko rababa trä ngitiekä ñänä trä kwrere amne, ngüre abko rababa tuen ürä kri ñukwä jutra kwrere. <sup>2</sup>Angwane angele ye abko nämä näin täräkwata chi metaninte ngwena kisete. Angele ye abko käkwe ngoto küde ruenkri mikaba mrenbti amne ngoto küde ngeberekri abko mikaba dobo nõtabti jate. <sup>3</sup>Bti lion tä ngwäne krikri ja dibti, ye kwrere jire angele ye käkwe ngrateba kri ja dibti angwane, unsuni krä kükü ngö rababa ruen tie. <sup>4</sup>Unsuni krä kükü kukwei käkwe kukwe nieba, ye ti rikabara tike täräbtä angwane, ni kukwei rababa ruen kä käinbti tie, käkwe nieba krörö: Unsuni kukwei nibi krä kükü käkwe dre nini ye tuemetre tiebe. Makwe ñan tika täräbtä abko ni kukwei jaraba kore tie. <sup>5</sup>Angwane tikwe angele tuaba ngoto mike mrenbti amne dobo nõtabti jate, angele ye ara käkwe kise ruenkri kakaba käin amne kukwe niedi kwe abko kukwe era erere bä mikakäre, <sup>6</sup>bti nieba krörö kwe: Ngöbö Nünanka Kärekäre amne Ngöbö kä käin, kä

temen dātekā ara kākwe mren dātebare amne jāndrān jōkrā tā te dātekā, Ngōbö ye kābti ti bike kukwe era erere niere krōrō: ¶Ngōbökwē nān kā ngibiadi jire chi mda! <sup>7</sup>Akwa angele ni kükükäre kākwe drü jükadi angwane, batibe kukwe kaibe tiebe Ngōbökwē ye rabadi bare tāte jōkrā, Ngōbökwē niebare niara kukwei niekā jōkrāye ye kwrere.

<sup>8</sup>Angwane ni kukwei jaraba krire kā kāinbti tie ye kākwe niebata krōrō mda tie: Angele tā nūnaninkā amne ngoto kwārā tā mrenbti amne ngoto kwārā abko tā dobo nōtabti jate abko tārākwata chi metaninte tā kisete kwe, ye nān kārere ie, nieba kwe tie. <sup>9</sup>Ye erere ti rikaba kākwe nieba krōrō angele ye ye:

Tārākwata chi tā ma kisete, ye ngwen tie, tikwe nieba ie.

Angwane angele ye kākwe nieba mda tie:

Tārākwata ne, amne kweta makwe. Tārākwata ye bānān rabadi mane munkō kwrere ma kadate, akwa ma būlete abko bānān rabadi kwaka, nieba kwe tie.

<sup>10</sup>Ye erere bkānā, tārākwata chi nāma angele kisete, ye tikwe dianba kisete, bti tikwe kwetaba. Angwane bānān rababa mane munkō kwrere ti kadate, akwa tārākwata ye rikaba mate ti teri angwane, bānān rababa kwaka. <sup>11</sup>Angwane nieba krōrō mda kwe tie: Mtare nitre juta kabre te amne nitre kukwei bātākā ngwarbe amne, nitre nūnanka kā ketareketare te amne nitre gobranka gobranka, yebtā makwe Ngōbö kukwei nieta btin mda abko nieba kore kwe tie.

### Ni nibu Ngōbö kukwei niekā

**11** <sup>1</sup>Yehti angelekwe krito bāsi nōrā kroko kwrere bianba kā nākākrā tie, kākwe nieba krōrō tie:

Ju blitakrā Ngōböbe amne nūkwā grā, ye nān nāke amne ni nibe tā Ngōbö kāikitekā yete, ye makwe tan jōkrā. <sup>2</sup>Akwa kā mikani jenena nitre nākare israelitarekrā ju blitakrā Ngōböbe kānti, ye abko makwe nān nākā, nōbtā nān angwane nitre nākare israelitare, ie kā ye bianina. Sō gre ketebu bti krobu niaratre kākwe rātādi jōkrā juta deme Jerusalén yehti, mikakäre ja tare nike.

<sup>3</sup>Angwane tikwe ni juandi nibu abko kākwe blitadi tikrā. Tikwe ja di biandi ietre amne niaratre rikadi Ngōbö kukwei niere kōbö 1,260. Ye abko, nitre Ngōbö kukwei niekā kirakira nāmane dān jūräre kite jabtā, ye kwrere nitre ye kākwe dān jūräre kitadi jabtā. <sup>4</sup>Ni nibu ye abko tā olibo krie dobu kwrere amne nōtra grā krobu kwrere tā kā temenbtā ni Dānkien ngwārekri. <sup>5</sup>Nane ni mda mda tō rabadre niaratre nibu ye mikai bren angwane, niaratre kukwei tā betekā nūkwā jutra kwrere kadate kākwe rüe kukwadre jōkrā. Ne aisete nire nire tō mikai bren abko gatadre jōkrā kore. <sup>6</sup>Mdakäre abko nitre nibu ye tā nāin Ngōbö kukwei niere angwane, niaratre di tārā kā mikakrā tōre, nū nān rākāndre jire chi

temen abkokäre. Erere di tërä ñö jökrä kwitakrä därire amne të rabadre ni mikai bren jume bätäkä ngwarbe, ye erere di tërä ni mikakrä ja tare nike bren bätäkä ngwarbe kisete arato.

<sup>7</sup>Akwa nitre nibu ye käkwe blitadi ünän jökrä Ngöbökrä angwane, ni bä jändrän kri krübäte kwrere abko di Satanakri, aisete të Kä Timonbti abko jatadi rüere nitre nibu ye rüere, bti ni jändrän krübäte kwrere ye käkwe niaratre nibu ganaindi kwäräbe amne kämikadi kwe. <sup>8</sup>Angwane juta ütiäte kri Jerusalén, kánti ni Dänkien müre ketani krusobtä, juta ye kánti nitre nibu ye ngwäkä rabadi kitanintbe tementa ji ngrabare. Juta kri ye mden abko kädianta Sodoma amne Egipto arato, nitre nünanka juta yete të nüne diän diän bä mikakrä. <sup>9</sup>Angwane köbömä bti ötare ni kä jökräbti temen, ni kukwe bätäkä ngwarbe amne ni bätäkä ngwarbe amne ni juta bätäkä ngwarbe te käkwe nitre nibu ye ngwäkä tuadi amne ñan doboi mikadre niedi kwetre. <sup>10</sup>Angwane nitre nibu kämikani ye abko käi rabadi nuäre nitre nünanka Ngöbö rüere btä, käkwe jändrän biandi ngwarbe jae kwärikwäri kä ngwiankäre nuäre jabtä, ñobtä ñan angwane nitre nibu Ngöbö kukwei niekä ye abko nämene ni nünanka Ngöbö rüere kä nebtä mike ja tare nike krübäte, aisete kämikani angwane, käi rabadi nuäre btätre.

<sup>11</sup>Akwa yehti kä rikaba köbömä bti ötare ta angwane, Ngöbökwere nitre nibu ye mikabata nire amne rababa tükänintbe krö. Ni jökrä käkwe tuaba nüketa nire abko rababa nekwetekä krübäte. <sup>12</sup>Angwane ni nibu ye ie ni kukwei jaraba kri kä käinbti, käkwe nieba krörö ietre: Mun jakwe kä käinbti nete, nieba kwe ietre. Ye btäräbe rikaba mütrate käin amne rüere käkwe tuaba jökrä niken kä käinbti.

<sup>13</sup>Ye btäräbe dobo rababa nakaenkä kri krübäte. Dobo rababa nakaenkä, ye kisete abko juta Jerusalén nämä ñäkänintbe keta jätä abko keteti rikaba ngwarbe temen amne ni kämikaba mili krä kükü dobo yekwe arato. Angwane nitre ruäre nämä nire abko btä kä jürä rababa krübäte amne Ngöbö kä käinbti se käikitakaba kwetre.

<sup>14</sup>Ye kwrere kukwe tare krübäte abko rikaba bobu ta, akwa kukwe tare ketamakäre abko kebera nuke mda.

### **Angelekwere drü krä kükükäre jükani**

<sup>15</sup>Yehti angele ni tikäre käkwe drü jükaba angwane, nitre kukwei rababa ruen krikri ja dibti kä käinbti, kä rababa niere:

Ni Dänkien Ngöbö amne Jesu Dianinkä Ngöbökwere abko kitera gobrane ni ngätäite.

Niaratrekwere gobrandi kärekäre, rababa niere.

<sup>16</sup>Angwane nitre unbren unbren ni gre bti nibkä nämä tükänintbe Ngöbö ngwärekri kürä gobrankrä kwekwehti rikaba, rababa ja okokrä mike nebe

dobobtä temen Ngöbö mikakäre ütiäte jae amne rababa Ngöbö käikitekä,  
 17kä rababa niere krörö:

Ni Dänkien Ngöbö, ma di kri jändrän jökrä bti ta amne ma tä  
 kärekäre.

Nunta kuin niere mae, ñobtä ñan angwane ma di kribti ma kitera  
 gobrane ni ngätäite.

18 Nitre kä jökräbti temen tä nüne ma rüere abko moto romon krübäte  
 makrä,

akwa makwe kukwe ükarete ni krütani kräke, mikakäre ja ngie  
 nuen abko käi nüra.

Amne nitre sribikä makwe käta ma kukwei niere, ye abko ie ma  
 kitera sribi ütiä bien.

Erere arato, ni ütiäte krikri ya, o ni bobre bobre ütiäte ñakare, akwa  
 tä ma käikitekä, ye abko juta deme makwe, ye ie makwe sribi ütiä  
 biandi.

Amne nire nire käta kä temen ne juen ngwarbe abko makwe juandi  
 ngwarbe arato,

abko nitre unbre unbre rababa niere.

19 Angwane ju blitakrä Ngöböbe nämä kä käinbti abko jukwe tikaba  
 amne ju yete abko kaja nämä, btä ti okwä rababa. Kaja ye abko te kukwe  
 ükaninte Ngöbökwé nitre israelitabe abko nämä ükani abko btä ti okwä  
 rababa. Angwane mera trä rababa, kä ngö rababa ruen amne unsuni ngö  
 rababa amne dobo rababa nakaenkä amne nü järe järe rababa näkäen  
 kabre temen ti okwäbti.

### Meri amne mökata kri

**12** 1 Ye btäräbe Ngöbökwé jändrän kuin, ütiäte kri bä mikaba kä  
 käinbti abko tikwe tuaba. Ye abko, Ngöbökwé dre nuendi bä  
 mikaba abko krörö: Meri iti nämä kä käinbti abko btä ñänä trä nämä  
 dän kwrere amne, sö abko nämä niara ngoto täni. Erere arato, korona  
 nämä niara dokwäbti abko btä muke bä nämä kwä jätäbti kubu. 2 Meri  
 ye ñakare mobe bren kwe kisete, aisete jataba ja ngibiare amne rababa  
 ngrente krikri be ja ngibiabtä.

3 Yebti jändrän mdara jire rababa kä käinbti sete abko mökata kri  
 krübäte bä tain rababa tuen tie. Mökata ye abko Satana ara bä mika  
 nämä. Mökata ye abko dokwä kwä kükü amne korona nämä mikani  
 dokwä kwatirekwatire bti amne krotu krä jätä ie, niara bäri dite bä  
 mikakrä. 4 Angwane muke kä käinbti<sup>e</sup> se nämä ñäkänintbe ketamä  
 abko mökata ye käkwe muke sökakaba keteti ja kübarabti, bti kitaba  
 timon kwe kä temen nebtä. Abti meri nämä ja ngibiare amne ngäbäkre

e 12.4 Muke ye abko angele ngökani Satanakwe Ngöbö rüere bä mikata nütüta.

däredre kwe abko mökata ye tö rababa kwetai jötrö kån, abkokäre rababa nünaninkä meri kánti yete. <sup>5</sup>Angwane ngábäkcre däreba brare meri yekwe abko Jesu Dianinkä Ngöbökwe bä mikata. Ngábäkcre ye abko kákwe gobrandi ja di kribti juta jökräbti, kákwe juta jökrä mikadi ja ngoto täni. Akwa ngábäkcre ye däreba angwane, batibe Ngöbökwe dianinkä jenena mökata ngäniene amne jårikaba nebe Ngöbö kánti, kürä gobrankrä Ngöbökwe ye kánti gobrane Ngöbö ben gwaire. <sup>6</sup>Akwa meri ngábäkcre ngibiaka ye abko gitiaba kä kaibete. Ngöbökwe kä ükaninante biare kråke, kánti gitiaba. Ye kánti abko Ngöbökwe bukadre köbö 1,260 abkokäre gitiaba yete.

<sup>7</sup>Yebti rüba krörö mda kä kåinbti: angele Miguel btå angele mda mda kákwe rüba mökata amne angele üai käme kwekwe rüere. <sup>8</sup>Akwa niaratre abko di ñakare ganainkrå, aisetee angele Miguel btå angele mda mda ye kákwe mökata ye ganainba kwåråbe, aisetee kä ñan rababa mda niaratrekrå nünankrä kä kåinbti. <sup>9</sup>Abtä mökata kri kådekata tbi kira, arabe kådekata Diablu amne Satana tä näin ni ngökö kwati kä jökråbti temen, ñan rikadre ji Ngöbökwebti abkokäre. Mökata ye btå angele üai käme kwekwe ben kitaba jökrå timon nüke kä nebtå. <sup>10</sup>Angwane ni kukwei jaraba kri ja dibti kä kåinbti tie, kä rababa niere krörö:

Kå ni diantarikrä nüra.

Ngöbö nikwe di kri kitera gobrane amne, Ni Dianinkä Ngöbökwe abko nüra gobrane arato,

ñobtä ñan angwane dibire rare ni mråkä rüee Satana kä nämene ni mråkä tödekaka Jesubti kite ngise Ngöbö nikwe ngwårekri abko kitaninkåra kä kåin båre mento nüke kä temen nebtå.

<sup>11</sup> Ni Kordero kwrere dårie ianinte krusobtä ni ngite diankakåre mento btåtre, ye köböire ni mråkä tödekaka niarabti kákwe Satana ganainbare.

Erere arato, ni mråkä kákwe kukwe kuin Jesubtä nieba angwane, ja kwata namani ruentari tare ñakare ietre, kákwe kä jürå ngwiani ñakare jåbtå, aisetee nämene biare ngataen kukwe kuin niebtå.

Yebti Satana ganainbare kwetre arato.

<sup>12</sup> Ne aisetee mun nünanka kä kåinbti kä ngwen nuåre jåbtå munkwe. Akwa aingwaree mun nünanka kä temenbtå amne mun nünanka kä butubti mrente.

Mun ye abko bobre jakån, ñobtä ñan angwane kä kitera neme braibe diabluye rükåre Ngöbö rüere, aisetee mätå kri mun nünanka kä temenbtå ye rüere,

abko ni kukwei rababa ruen tie.

<sup>13</sup>Mökata kitaba timon kä temen nebtå angwane, meri kákwe ngábäkcre ngibiabare ye jiebti mökata rikaba kisere mikakåre ja tare nike. <sup>14</sup>Akwa meri ye abko gitiadreta kä kaibete tbi ngäniene, abkokåre mü kri ngike



kwrere Ngöbökwe bianba ie rikakakrä, ye erere bkänä meri ye gitiabata mobe tbi ye ngäniene. Ye kanti Ngöbökwe ngibiaba kä komä bti ötare. <sup>15</sup>Angwane tbi ye käkwe ño yaiba kabre meri ye rüere mda, ño ye abko rabadre kri, kä rikadre meri ye ngwena nguse, abkokäre yaiba kwe. <sup>16</sup>Akwa dobo temen ye käkwe meri ye die mikaba amne, ño kri yaiba mökatakwe, ye dobokwe ñakaba jökrä, aisete mökatakwe meri kämikani ñakare.

<sup>17</sup>Yebtä abko mökata ye mätä rababa kri krübäte meri yebtä angwane, rikaba rüere meri ye bkün mda mda rüere. Meri bkün mda mda abko ni Ngöbö kukwei mikaka täte era metre amne ni blitaka Jesu kräke, ye rüere mökata rikaba rüere.

### Ni jändrän kri krübäte kwrere jataba mrente käin

**13** <sup>1</sup>Yebti mökata rababa nünaninkä mren köräbti. Yebti ni jändrän kri krübäte kwrere jire abko jataba mrente käin ti okwäbti mda. Ni ye abko dokwä kwä kükü amne krotu krä jätä ie, niara bäri dite bä mikakrä, btä ti okwä rababa. Angwane kukwe diän taretare tikani Ngöbö rüere näma ketaninkä kwati dokwä kwatirekwatire btä amne korona näma mikani krotu kratirekratire btä abko tikwe tuaba. <sup>2</sup>Ni jändrän kri krübäte kwrere tikwe tuaba, ye abko bä rababa tuen kwra leopardo kwrere tie amne ngoto abko rababa tuen oso ngoto kri kwrere tie amne kada abko rababa tuen krübäte lion kada kwrere tie. Ni ye abko ie mökata käkwe ja di bianba kri gobrankrä nibtä. <sup>3</sup>Ni jändrän kri krübäte kwrere ye abko träin kri dokwä kwatibtä abko kisete gatadre, akwa träin ye abko rababa quinta ie, bä rababa tuen tie. Yebtä abko ni jökrä ñan töi rababa krütare amne ni jökrä rikaba niara jiebtä. <sup>4</sup>Angwane mökata käkwe ja di bianba ni jändrän kri krübäte kwrere ie. Yebtä abko ni jökrä rababa mökata ye mike ütiäte Ngöbö kwrere. Erere arato, ni jändrän kri krübäte kwrere ye mika rababa ütiäte kwetre arato, kä rababa niere krörö: Ni jändrän kri krübäte kwrere tä nete, ne kwrere ni ñakare jire mda. ¿Nirekwe rüdre ni ne kwrere rüere se? rababa niere.

<sup>5</sup>Mdakäre abko, ni jändrän kri krübäte kwrere ye abko ie ja di bianba kri kä nebtä sö gre ketebu bti krobu. Erere arato, niarakwe bikadre kri, käkwe ñäkadre kämekäme Ngöbö rüere, abkokäre kä bianba kore ie. <sup>6</sup>Ye erere bkänä, ni ye käkwe ñäkäba kämekäme krübäte Ngöbö rüere amne kä käinta, kanti Ngöböta nüne, ye rüere ñäkäba diän diän kwe. Erere arato, nitre nünanka kä käinbti, ye rüere ñäkäba kwe. <sup>7</sup>Erere arato, juta deme Ngöbökwe rüere rüdre kwe, ye ganaindre kwäräbe kwe amne kämikadre kwe, abkokäre kä bianba ie rükäre bentre. Erere arato, ni bätäkä ngwarbe amne juta bätäkä ngwarbe amne ni kukwe bätäkä ngwarbe amne kä bätäkä ngwarbe bti rabadre gobrane, abkokäre ja di bianba ie arato. <sup>8</sup>Angwane Ngöbö ngämi kä ne dätäre, känenkri

ni Kordero kwrere nämane mikani biare kámikadre ni mdaye ni jökrä kräke. Ye abko, nire nire ñakare jen niarakwe abko kä tä tikani ñakare tärä ni nünandi kärekäre mikakrä gare yebtä, ni ye abko käkwe ni jändrän kri krübäte kwrere mikadi ütiäte jae Ngöbö kwrere.

<sup>9</sup>Nire nire olo tärä abko käkwe olo ketate kukwe neye:

<sup>10</sup>Nire nire järikadre ngite tödekabtä Jesubti,  
ye erere jänän ngite.

Nire nire kámikadre ngitrabti tödekabtä Jesubti,  
ye erere kámikadi ngitrabti.

Kukwe rakadikä kore angwane, juta deme Ngöböke käkwe nünandrekä dite jabtä bätärekä ja täritäri amne Jesu rükandrete ñakare kwetwe, akwa tödekadre kwatibe Jesubti janknu.

### Ni jändrän krübäte kwrere mda jatani dobote käin

<sup>11</sup>Yebti ni mdara jire jataba dobote käin, akwa niara abko ni jändrän krübäte kwrere jataba, rababa tuen tie. Ni ye abko krotu krobu ie abko rababa tuen kordero krotu kwrere tie, akwa ñan ñäkäba jáme kordero kwrere kwe, akwa rababa ñäke mökata kwrere. <sup>12</sup>Amne ni jändrän kri krübäte käne ye di rababa jökrä kwe, kä rababa sribire ni käne ye diäre. Ni jändrän kri krübäte käne abko träin kri dokwä kwatibtä abko kisete gatadre akwa namaninta quinta ie, ye kräke ni mda ye rababa sribire, kä rababa ni käne ye mikamna ütiäte Ngöbö kwrere ni jökrä kä nebtäye.

<sup>13</sup>Erere arato, ni ye rababa sribi kri ñan tuabare nuene, kä rababa ñukwä kä käinbti mike kite timonkwäre ni mda mda okwäbti, niara di kri Ngöbö kwrere abko ni jökrä käkwe nütüdre, abkokäre sribi kri ñan tuabare nuenbare kore kwe ni ngökakäre. <sup>14</sup>Angwane ni jändrän kri krübäte kwrere nämä käne, ye mikakäre ütiäte, ni mda ye rababa sribi kri ñan tuabare nuene. Yebtä abko ni kwati ngökaba kwe. Erere arato, ni jändrän kri krübäte kwrere abko dokwä kwati tikaninkä ngitrabti kámikakäre, akwa träin namaninta quinta ie amne namani nüne janknu, ye bä sribemna kwe mikakäre ütiäte Ngöbö kwrere, ye erere ni jökrä käkwe sribebare. <sup>15</sup>Angwane ni jändrän krübäte kwrere nibukäre, ie ja di bianba bä ye mikakrä nire abko erere nuenba kwe. Amne nire nire käkwe ñan ni käne ye bä mikadre ütiäte jae Ngöbö kwrere abko kámikadre kwe abko jändrän bä nämä niere.

<sup>16</sup>Mdakäre abko, ni ngwarbe amne ni ütiäte, ni ngwian bkänkä krikri amne ni bobre bobre, ni klaboré ñakare amne ni klaboré abko btä ni jändrän kri krübäte kwrere nämä käne ye kä tikadre ni kise ruenkri btä o ni okobtä abko ni mda ye käkwe nieba abko erere mikani nuene. <sup>17</sup>Akwa nire nire btä ni jändrän kri krübäte kwrere nämä käne ye kä nämä tikani ñakare, ni ye ñan rabadre jändrän rürümoine amne jändrän kökö jae. Ni käi ye abko ni jändrän kri krübäte kä o niara kä tikani kö okwä jändrän

tankräfti. <sup>18</sup>Amne kö okwä jändrän tankrä, bti ni jändrän kri krübäte kwrere käita tikani, ye abko nire nire töbtä aibe ie ni ye raba nuke gare. Kö okwä jändrän tankrä yehti, aisete ni ye abko kä tikata kö okwä jändrän tankräfti abko 666.

### Ni 144,000 abko Ngöbökwé mikani jenena jakrä

**14** <sup>1</sup>Yehti ni Kordero kwrere nämä nünaninkä ngitio Siónbti, btä ti okwä rababa angwane, ni ye ben abko ni mda nämä 144,000. Angwane nitre okobtä Kordero ye kä nämä tikani amne Kordero rün kä nämä tikani arato niaratre nämä nitre ye bkäne bä mikakrä abko rababa tuen tie. <sup>2</sup>Yehti ñö ngöta nebe kri, ye kwrere jire kä ngö rababa ruen kä käinbti tie. Erere arato, unsuni ngöta nebe krikri ja dibti, ye kwrere kä ngö rababa ruen tie. Mdakäre abko, ni kwati rababa arpa kabre täke gwaire jökrä abko kwrere jire kä ngö rababa ruen tie. <sup>3</sup>Angwane kürä gobrankrä Ngöbökwé ye ngwärekre nitre 144,000 rababa ka btin niere. Erere arato, jändrän kräbkä nämä kürä bäre temen ye ngwärekre amne nitre unbre unbre ngwärekre ka btin ye nieba kwetre arato. Akwa ka btin, yehtä ni mda mda ñan rababa töi ngitiekä jire chi amne nitre 144,000 kökanintarita Ngöbökwé jakrä, ye aibe ie ka btin ye rababa nuke gare. <sup>4</sup>Nitre ye abko, ni deme ja mike gure ñakare meribe, ye kwrere jire nitre ye käkwe ja ngibiabare deme, käkwe ngöbö ngwarbe ngwarbe mikani ütiäte ñakare jae. Ni Kordero kwrere nämä niken mdente erere abko jiehti niaratre nämä niken. Erere arato, ni Kordero kwrere krütani krusobtä angwane, ni jökrä ngätäite niarakwe ni ye kökani Ngöbökrä, bti nura ngwä ötata käne, ye bianta ngwarbe Ngöböye kuin niekäre ie, ye kwrere niaratre nämä biani Ngöböye amne ni Kordero kwrereye kuin niekäre ietre. <sup>5</sup>Amne blitabare era metre kwetre Ngöbökrä amne ni mda ngökani ñakare jire chi kwetre, aisete ni mda mda ñan rababa kite ngise jire chi. Nitre ye mden abko ie ka btin rababa nuke gare.

<sup>6</sup>Yehti tikwe angele mdara jire tuaba abko rababa nikenkä käinta sete. Angele ye abko nämä Ngöbö kukwei kuin kärekäre ngwena niedre ni jökrä nünanka Ngöbö rüere kä temenbtä yeye. Ye mden kisete, ni kä jökräfti temen amne ni bätäkä ngwarbe amne ni kukwe bätäkä ngwarbe amne ni nünanka juta kwatirekwatire te abko kräke angele ye nämä Ngöbö kukwei kuin ye ngwena, <sup>7</sup>kä rababa niere krörö ja dibti: Ngöbö jürä ngwian jabtä munkwe amne niara käikitaka munkwe, ñobtä ñan angwane niarakwe kukwe ükarete ni kräke mikakäre ja ngie nuen abko käi nüra amne, Ngöbö kä käinbti btä kä tementa dätekä amne Ngöbö mren dätekä btä ñö dätekä, Ngöbö ye abko mika ütiäte munkwe abko angele ye rababa niere kore ti okwäfti.

<sup>8</sup>Yehti angele jataba nibukäre mda abko käkwe juta Roma bä mikaba juta Babilonia kwrere, kä jataba niere krörö: Meri bti kä ngwarbe käta ni

brare brare näkwite ja mikakäre ngite, ye kwrere jire nitre nünanka juta kri Babilonia käkwe ni kwati kä jökräbti temen näkwitani, aisete ni kwati töi nikwitani jäme käkwe ja mikani ngite ben Ngöbö rüere, akwa juta kri ye abko nikira ngwarbe jökrä, angele ye rababa niere.

<sup>9</sup>Yehti angele jataba nimäkäre mda. Angele ye abko jataba ñäke ja dibti, kä jataba niere krörö: Ni jändrän kri krübäte kwrere arabe bä sribebare, ye nire nire käkwe mikadre ütiäte ngöbö kwrere jae amne nire nire käkwe ja tuadremetre ni ye kä tike ja okobtä o ja kisebtä, <sup>10</sup>nitre ye abko btä Ngöbö mätä rabadi kri krübäte abko uba döi kwaka ñata kwrere jire rabadi kräke, ñobtä ñan angwane uba döi ngätäre kwaka ye kwrere jire Ngöbö mätä nibi, aisete nitre ye abko käkwe ja tare nikadi kri krübäte ñukwä jutrate amne asufrete angele deme Ngöbökwere ngwärekri amne ni Kordero kwrere ngwärekri arato. <sup>11</sup>Ne aisete, nitre ni jändrän kri krübäte kwrere mikaka ütiäte jae amne ni ye arabe bä sribebare abko nire nire käkwe kä tikani jabtä abko käkwe ja tare nikadi kärekäre dibire rare, aisete kä rabadi ñakare jadükakrä ietre. <sup>12</sup>Ngöbökwere ni ye mikadre ja tare nike kore, kukwe nebtä abko juta deme Ngöbökwere tödekaka Jesubti, käta Ngöbö kukwei mike täte ye abko käkwe ja die mikadre nüne dite Ngöbökrä.

<sup>13</sup>Yehti ni kukwei jaraba mda kä käinbti tie, käkwe nieba krörö tie: Tärä tike krörö: Mtare mentokwäre nire nire tödekaka ni Dänkienbti tä krüte, ni yehtä kä rabadi nuäre amne Ngöbökwere ja di biandi ie.

Jän, abko kore era metre nieta Ngöbö Üaikwe, ñobtä ñan angwane nitre ye käkwe jadükadi, ñan sribidre mda kwe, amne sribibare kuin kwetre, ye abko Ngöbökwere ütiä biandi ietre abko tike kore täräbtä, nieba kwe tie.

### Ni jökrä ükaninkrö kukwe ükatekäre kräke

<sup>14</sup>Yehti tikwe nikraba mda angwane, müta ngwen bürere, btä ti okwä rababa. Angwane müta yehti abko ni iti Ni Kä Nebtä Ngobo kwrere rababa tuen tākänintbe tie. Angwane korona orore näma dokwäbti amne ngitra tänene tu grine ngwian näma kisete kwe. <sup>15</sup>Ye btäräbe ju blitakrä Ngöböbe kä käinbti te angele näma abko jataba ju bäre käkwe ñäkäba ja dibti ni näma tākänintbe mütabti yeye, käkwe nieba krörö ie: Ni kä jökräbti abko nura ngwä nena tain jökrä kwrere, aisete nura ngwä öta käi nüra, aisete ngitra tänene tä ma kisete, yehti nura ye tikekä, bti makwe ngwä öta, erere makwe ni jökrä ükärö Ngöbökrä, nieba kwe ie. <sup>16</sup>Ye erere bkänä, ni näma tākänintbe mütabti käkwe ni jökrä ükaninkrö Ngöbökrä ye bä mikakäre, ni ye käkwe ngitra mnianteba nura tikakakrä kä temen nebtä amne, ni jökrä ükäröba kwe kä nebtä.

<sup>17</sup>Abti angele mdara jire näma Ngöbö ngwärekri ju blitakrä Ngöböbe te kä käinbti, angele ye abko näma ngitra tänene tu grine ngwena

kisete arato. <sup>18</sup>Angwane ñukwä grä kri ngwäri mnü rä bäne kukwakrä Ngöböye, ye kanti angele mdara jire nämä. Angele ye abko di nämä ñukwä jutrabti. Angele ye abko käkwe ñäkäba ja dibti angele ngitra tänene ngwianka kisete yeye angwane, ni jökrä nünanka Ngöbö rüere bä mikaba uba kwrere kwe, käkwe nieba krörö ie: Uba nena tain btä amne kä uba ngwä ötakrä nüra, aisete ngitra ye mniente kä temenbtä amne, makwe uba ngwä öta küdekrä ngöi ngöi, nieba kwe. <sup>19</sup>Ye erere bkänä, angele ye käkwe ngitra tänene tu grine ye mnianteba kä temen nebtä angwane, uba ngwä tikakaba jökrä kwe uba kökräibtä. Yebti jändrän kri uba tükakakrä, te uba kitaba jökrä kwe tükakakrä. Uba tükarekä ngotobti, ne abko Ngöbö mätä kri nitre nünanka niara rüere btä bä mikata, erere niarakwe gadite jökrä abko bä mikata kore. <sup>20</sup>Angwane uba ye abko tükakaba juta Jerusalén bäre mento, akwa jändrän uba tükakakrä te uba tükakaba, ye kanti däri aibe rababa betekä kabre krübäte. Däri rababa neen kwata kri temen kilometro sientu krämä jire amne rababa mate mdä kadabtä rababa tuen tie.

#### Angele ni kükü jändrän taretare ngwianka ni rüere

**15** <sup>1</sup>Yebti jändrän mda krikri rakadrekä abko bä rababa kä känbnti abko btä ti ñan töi rababa krütare mda abko krörö: Ngöbö mätä kri ye abko rabadre bare täte jökrä nitre nünanka niara rüere btä abko angele ni kükü nämä näin jändrän taretare keta kükü mrä ngwena kisete, ni nünanka Ngöbö rüere mikakäre ja tare nike kri abko rababa tuen tie. <sup>2</sup>Mdakäre abko, jändrän mdara jire tuaba tikwe abko bä rababa tuen mren bidriore kwrere abko nämä mritani ñukwä jutgabe ketetibe rababa tuen tie. Mren bidriore ye kanti abko nitre nämä nünaninkä arpa ketaninte kisetekisete rababa tuen tie. Ni jändrän kri krübäte kwrere amne bä dätebare, ye nire nire käkwe mikani ñakare ütiäte ngöböre jae käkwe ganainbare kwäräbe amne niara kä tikani ñakare kwetre jabtä amne kö okwä jändrän tankrä ni yekwe abko mikani ñakare kwetre jabtä, ye mden ie Ngöbökwere arpa biani abko nämä kisete tākākkrä Ngöbö käikitakakäre. <sup>3</sup>Moisés, sribikä Ngöbökwere käkwe Faraón ganainbare angwane, ka niebare kwe Ngöbö käikitakakäre, ka ye kwrere niaratre nämä niere amne ni Kordero käkwe ka niebare, ye kwrere abko niaratre nämä niere abko krörö:

Ni Dänkien Ngöbö Di Kri Jändrän Jökrä Nuenkrä, makwe jändrän krikri krübäte nuenbare, ye abko bä nuäre jökrä.

Amne ma abko tä gobrane kärekäre.

Ma abko era metre amne ji makwe abko kuin metre jökrä.

<sup>4</sup> Ni jökrä käkwe ma jürä ngwiandre ni Dänkien.

Erere arato, ni jökrä käkwe ma mikadi ütiäte jae ni Dänkien, ñöbtä ñan angwane ma aibe kuin deme amne metre.

Erere arato, ni jökrä jatadi, käkwe ma käikitadikä, ñobtä ñan angwane mata kukwe ükete era metre ni jökrä kräke abko nena gare aiseite,

abko nitre ye rababa ka niere kore.

<sup>5</sup>Yebti tikwe nikrabata angwane, ju blitakrä Ngöböbe nuäre ngwiandre nämä kä käinbti abko jukwei gitiaba, rababa tuen tie amne, ju yete abko kukwe keta jätä biani nuendre nie Ngöböke abko nämä ükani.

<sup>6</sup>Angwane ju blitakrä Ngöböbe ye te angele ni kükü nämä abko jataba ju bäre. Angeletre ye abko nämä kukwe taretare krübäte nuendre keta kükü Ngöböke abko ngwian nämä kisete kwetre. Angeletre ye abko nämä dän merebe trä ngitiekä kädekata lino kitani jabtä te nämä näin amne koria orore nämä kitani ja kötäbti ta kwetre abko jataba tie. <sup>7</sup>Angwane jändrän kräbkä nämä Ngöbö bäre temen, jändrän ye krati abko käkwe blato orore te Ngöbö mätä kri nitre nünanka niara rüere btä nämä mikani abko bianba kwe angele itire itire ie. Ngöbö ye mden tä nüne kärekäre.

<sup>8</sup>Angwane ju blitakrä Ngöböbe nuäre ngwiandre abko te Ngöbö di kri bä rababa abko ngübü aibe rababa gwita temen amne, kukwe tare kri krübäte ngwian nämä angele ni kükükwe ye ngämi niken ta, känenkri ni ñan raba neme jire gw ju yete, rababa tuen tie.

#### Blato kwä kükü te Ngöbö mätä kri nämä mikani

**16** <sup>1</sup>Abti ju blitakrä Ngöböbe te ni kukwei rababa ruen kri ja dibti tie, kä rababa niere angele ni küküye: Ngöbö mätä kri tä mikani blato kwä küküte, ye mun nän iente kä temenbtä amne ni nünanka kä temenbtä sebti, nieba kore angeletreye. <sup>2</sup>Ye kwrere bkänä, angele rikaba iti käne käkwe Ngöbö mätä kri nämä blatote ye ianteba kä temen yebti angwane, ni jökrä, btä ni jändrän kri krübäte kwrere ye kä nämä tikani amne, ni jändrän kri krübäte kwrere abko bä sribebare, ye nire nire nämä mike ütiäte ngöböre jae, nitre ye abko kwata rababa ngütüete käme jökrä ietre abko bä rababa käme amne rababa tare krübäte ietre.

<sup>3</sup>Yebti angele nibukäre käkwe Ngöbö mätä kri nämä blatote ye ianteba mrenbti angwane, ñö mrente ye rikwitaba därire jökrä. Däri ye abko rikrakaba ribi ribi bäsi ni kämikata angwane, ni däräie tä nikrenkä ye kwrere jire mren ñöi rababa, aiseite jändrän nünanka mrente mrente ye gataba jire jökrä.

<sup>4</sup>Yebti angele nimäkäre käkwe Ngöbö mätä kri nämä blatote ye ianteba ñö krikribti amne ñö okwä kiakiabti. Angwane ñö amne ñö okwä ye rikwitaba därire jökrä arato. <sup>5</sup>Angwane angele mdara jire abko ñö ngibiabtikä kukwei jaraba tie, käkwe nieba Ngöböye:

Ngöbö Deme, ma nämänena kira kena amne ma tä käre mtare.

Mata ni mike ja tare nike kore, se abko mata nuene kuin era metre,

<sup>6</sup>ñobtä ñan angwane nitre nünanka ma rüere käkwe juta deme

makwe kāmikani angwane, niaratre dārie ianinte kabre kā temen nebtā.

Erere arato, nitre ma kukwei niekā dārie ianinte kwetre.

Ye mden ūtiāre abko mata dāri bien ñadre ietre mtare.

Niaratre kākwe kukwe nuenbare kore, ye mden ūtiāre mata nuene kore btātre arato ye. Abko kore se,

nieba angelekwē Ngöböye.

<sup>7</sup>Yebti ñukwā grā kānti abko ni kukwei jaraba mda tie, kākwe nieba Ngöböye: Ni Dänkien Ngöbö Di Kri Jändrän Jökrā Nuenkrā, ma abko tā kukwe ūkete kuin era metre nitre nūnanka ma rüere krāke, rababa niere kore Ngöböye.

<sup>8</sup>Angwane angele nibkākāre kākwe Ngöbö mātā kri nāma blatote ye ianteba ñānānti angwane, ñānā ye ie ja di bianba ni kukwakrā ñukwā kwrere. <sup>9</sup>Angwane ñānānkwe ni jökrā kwata kukwaba tare krübāte angwane, Ngöbö kukwe taretare kri juanka, ye rüere rababa ñāke kāmekāme jirekābe mda, akwa kukwe kāmekāme kitaba ñakare temen kwetre amne Ngöbö mikaba ūtiāte ñakare jire chi kwetre jae.

<sup>10</sup>Yebti angele nirikekāre kākwe Ngöbö mātā kri nāma blatote ye ianteba ni jändrän kri krübāte kwrere nāma gobrane yebti. Angwane kā gobrankrā kwe, ye kānti kā rababa iko jökrā. Ye ngwane kukwe taretare nakaninkāra nibtā, abtā ni jökrā rababa ja tare nike kri, kā rababa ja tüdrā kwete be tute ja tare nikabtā. <sup>11</sup>Akwa niaratre nāmane ja mike ngite ño ño Ngöbö rüere abko kitaba ñakare temen kwetre amne jirekābe rababa ngütüete jökrā ngrabare, kisete rababa ja tare nike kri krübāte, abtā rababa ñāke kāmekāme Ngöbö kā kāinbti se rüere.

<sup>12</sup>Yebti angele ni tikāre kākwe Ngöbö mātā kri nāma blatote ye ianteba ñö kri Eufratebti angwane, nitre gobranka btā rükā kwekwe kā driri jatani abko rikadre kā nōtabti ta, abkokāre ñö kri Eufrates ye grōtaba jökrā.

<sup>13</sup>Yebti tikwe jändrän tuaba krörö mda: Mökata kadate, ni jändrän kri krübāte kwrere kadate amne ni ngöbö ngwarbe kukwei niekā abko kadatekadate ūai kāme gwre kwrerekwrere jataba komā mentokwāre ti okwābti. <sup>14</sup>Angwane ūai kāme komā bā rababa gwre kwrere ye rababa sribi kri ñan tuabare nuene abko rikaba nitre gobranka krikri kā jökrābti temen ūkekrö rükāre Ngöbö Di Kri Jändrän Jökrā Nuenkrā ye rüere. Ye nāire Ngöbökwē rüe ganaindi kwārābe.

<sup>15</sup>Angwane ni Dänkien abko kākwe nieba: Ni gokā tā kite batibe, ye kwrere ti jatadita, aisete munkwe mokre jabti amne nire nire tādi mokrere jabti kākwe ja ngibiadre kukwe kāmekāme Ngöbö rüere ye ngāniene angwane, ñan tādre dikekā ni bütiere kwrere, abkokāre tā dān ngibiare kuin jökrā jabtā amne bütiēkrā gaidre kri krāke abko ñan tuadre ie, abkokāre tā dān ngibiare kuin jakrā, ye abko tādre ja ngibiare kukwe

kámekáme Ngöbö rüere ngäniene. Ni ye abko btä kä rabadi nuäre amne Ngöbökwé ja di biandi ie. Abko kore se, nieba ni Dänkienkwe.

<sup>16</sup>Yebti üai käme nimä ye käkwe nitre gobranka krikri ükäröba jökrä kä kädianta Armagedón hebreore ye kánti rükäre Ngöbö rüere.

<sup>17</sup>Angwane angele ni kükükäre käkwe Ngöbö mätä kri nämä blatote ye ianteba mürete káinta. Ye btäräbe ju blitakrä Ngöböbe, kánti Ngöbö nämáne tákänintbe kürä gobrankräbti, ye kánti ni kukwei rababa kri, kä rababa niere krörö: ¡Jändrän jökrä nibira bare täte jökrä! ni kukwei rababa niere. <sup>18</sup>Angwane mera rababa trä ngítiekä, kä ngö rababa, unsuni ngö rababa krikri krübäte amne dobo jataba nakaenkä abko rababa dobo mike grüekä jökrä, ye abko ni nükani nüne kä nebtä angwane dobo ñan rakakabare kri krübäte abko erere dobo rakakaba.

<sup>19</sup>Dobo rakakaba kri krübäte ye abko käkwe juta kri Babilonia<sup>f</sup> ñäkänintbe ketamä temen amne ju krikri juta mda mdate rikaba jökrä temen. Angwane Ngöbö mätä kri bä mikata uba döi kwaka kwrere jire, bti juta Babilonia mikadre ja ngie nuen kwe ye abko rükabata töre ie.

<sup>20</sup>Angwane kä butu mrente amne kä ngitiore krikri mentokwäre abko rikaba ngwarbe jökrä amne rababa tuen ñakare mda amne, <sup>21</sup>ñü jä kukwän kwrere kä káinbti rababa näkäen temen nibti. Ñü järe ye abko däbä kilo gre ketebu näre abko rababa näkäen temen. Ngöbö rababa ni mike ja tare nike kri krübäte kore, yebtä abko ni jökrä rababa ñäke kámekáme Ngöbö rüere.

### Meri tákänintbe jändrän krübäte yebti

**17** <sup>1</sup>Abti angele ni kükü kisete Ngöbö mätä kri nämä blatote abko ianteba kwetre, angele ye abko iti jataba käkwe nieba krörö tie:

Meri bti kä ngwarbe kri krübäte abko tä tákänintbe ñö bätäkä ngwarbe bti, se mikadi ja ngie nuen ño Ngöbökwé abko ti bike mike tuare mae, aisete jakwe tuen, nieba kwe tie. <sup>2</sup>Angwane nitre jreire kä jökräbti temen käkwe kä kwita kwitaba jabti meri ye ben gwaire. Erere arato, nita nebe dröbare angwane, káta nebe nenkä ni dokwäbti, ye kwrere jire nitre nünanka kä nebtä dokwäbti kä rababa nenkä, aisete kä rababa ngwarbe bti meri ye kwrere amne kukwe diän diän nämáne nuene.

<sup>3</sup>Yebti Ngöbö Üai rükaba täte jökrä tibtä angwane, angele ye rikaba ti ngwena kä kaibete mda. Ye kánti tikwe meri tuaba iti amne, ni jändrän kri krübäte kwrere bä tain, bti meri ye nämä tákänintbe. Ni jändrän kri krübäte kwrere töi nämä jökrä Ngöbö rüere, aisete kwatabtä kukwe kámekáme taretare nämä tikani Ngöbö rüere. Mdakäre abko, ni jändrän kri krübäte kwrere dokwä kwä kükü amne krotu krä jätä ie abko bti meri ye nämä. <sup>4</sup>Meri tuaba tikwe ye abko btä dän ütiäte kri bä mikibare nämä

<sup>f</sup> 16.19 Juta Babilonia káta juta Roma bä mike nütüta.



amne dän tain näma btä. Erere arato, meri ye käkwe ja dätebare kuin jändrän ororebti, jä tuäretuäre bti amne perlabti. Meri ye kisete abko baso orore näma arato. Baso yete abko jändrän kämekäme Ngöbö rüere btä ni mätä kri Ngöbö rüere amne jändrän ngwarbe käme nuen näma niarakwe kä mikakrä ngwarbe jabti abko näma basote kwe. Ye abko meri näma töbike kore amne näma nüne kore Ngöbö rüere abko bä mikata baso yebtä. <sup>5</sup>Amne meri ye kä näma tikani krörö okobtä:

MERI NE ABKO NIRE ABKO TÄ ÜKANI TIEBE.

MERI NE ABKO TÄ JUTA KRI BABILONIA BÄ MIKE.

MERI JÖKRÄ, BTI KÄ NGWARBE ABKO NIARA KWRERE, AISETE DÄREBARE NIARAKRI.

AMNE KUKWE KÄME DIÄN DIÄN NGÖBÖ RÜERE JATANI NIARAKRI,

abko näma tikani kore meri ye okobtä. <sup>6</sup>Yebti käta neme nuäre nibtä dröba kisete, ye kwrere meri yebtä kä näma nuäre juta deme Ngöbökwé ye däre kisete, ñobtä ñan angwane niarakwe nitre tödekaka Jesubti kämikani blitabtä Jesukrä, ye käi ngwian näma nuäre kwe jabtä abko kisete näma ni dröbare kwrere tikwe gaba mda.

Angwane meri tuaba tikwe, yebtä ti töi ñan rababa krütare. <sup>7</sup>Abtä angele ye käkwe nieba krörö tie:

¿Ye ñobtä abko ma ñan töi nebe krütare meri se tuare ye? Meri se tä kukwe ño bä mike abko tä kaibe tiebe abko ti bike niere mae. Ni jändrän kri krübäte kwrere dokwä kwä kükü ie amne krotu Krä jätä ie käta meri se ngwena abko käta dre bä mike abko ti bike niere mae abko krörö: <sup>8</sup>Ni jändrän kri krübäte kwrere turi makwe, ye abko nämane nüne kira, akwa mtare tä nüne ñakare mda, akwa jändrän ye abko juan ngämi ngwarbe Ngöbökwé, känenkri nämane Kä Timonbti abko jatadita kä temen nebtä angwane, Ngöbökwé juandi ngwarbe. Angwane Ngöbökwé ni dätebare kira kena, ye ngwane mentokwäre tärä ni nünanka kärekäre Ngöböbe mikakrä gare, yebtä nire nire käita tikani ñakare abko käkwe ni jändrän kri krübäte kwrere ye tuadi angwane, niaratre ñan töi rabadi krütare ni jändrän kri krübäte kwrere yebtä, ñobtä ñan angwane niara nämane nüne kira akwa mtare tä nüne ñakare, akwa jatadita bobuta aisete.

<sup>9</sup>Mdakäre abko, kukwe ne ti bikera niere mae abko ni töbtä ie rükadre gare abko krörö: Ni jändrän kri krübäte dokwä kwä kükü, ye abko ngitio kwä kükü, bti merita tākänintbe abko bä mikata. Erere arato, jändrän dokwä kwä kükü ye abko tä jrei ni kükü bä mike. <sup>10</sup>Akwa jrei ni kükü ye ngätäite abko jrei nirike käkwe gobranbarera, bti nikanina ngwarbe amne tä gobrane ñakare mda. Jrei iti abko gwängware tä gobrane amne, iti mda abko ngämi nuke gobrane, akwa rükadi angwane ñan gobrandre raire kwe. <sup>11</sup>Angwane ni jändrän kri krübäte kwrere nämane nüne kira akwa mtare tä nüne ñakare mda, ye abko jrei ni kwäkäre abko bä

mikata. Jrei ye abko kākwe sribidi ja kwrere jrei ni kükü yebe, akwa mrä Ngöbökwe juandi ngwarbe.

<sup>12</sup>Angwane krotu krä jätä turi makwe ye abko jrei ni jätä ngämi nuke gobrane, akwa niaratre rükadi gobrane angwane, kä biandi ñänä okwä kratibe ietre gobrankrä ni jändrän kri krübäte kwrere ye ben gwaire.

<sup>13</sup>Jrei ni jätä ye abko töi ja kwrere jökrä, aiseite ni jändrän kri krübäte kwrere ye ie ja di biandi kwetre, aiseite ni jändrän kri krübäte tö dreye, erere nuendi kwetre kräke. <sup>14</sup>Angwane niaratre kākwe rüdi ni Kordero kwrere ye rüere, akwa ni Kordero kwrere ye kākwe ganaindi kwäräbe, nitre käräbare Ngöbökwe dianinkä jakrä tä nüne janknu Jesukrä ye ben gwaire. Ni Kordero kwrere kākwe ganaindi, ñobtä ñan angwane ni Kordero kwrere ye abko tä nitre dänkien krikri dänkiene amne tä gobrane nitre gobranka krikri bti arato aiseite.

<sup>15</sup>Mdakäre abko, ñö bti meri bti kä ngwarbe tä tākänintbe turi makwe, ye abko ni jökrä amne ni kukwe bätäkä ngwarbe blitaka amne ni kä jökräbti temen abko turi ñö kwrere makwe. <sup>16</sup>Angwane krotu krä jätä turi makwe amne ni jändrän kri krübäte kwrere turi makwe ye abko mätä rabai kri meri bti kä ngwarbe yebtä angwane, meri juandi ngwarbe amne meri mikadite kaibe bütiere kwe. Erere arato, meri ye ngätä kwetadi jökrä kwetre amne kroko kiakia abko kukwadi jökrä ñukwäte kwetre. <sup>17</sup>Dre nuendre, ie Ngöbö tö namani, erere mikani kwe niaratre töite, aiseite niaratre töi rabadi ja näre, kākwe ja di gobrankrä ye biandi ni jändrän kri krübäte kwrere yeye abti Ngöbökwe dre niebare, ye erere rabadi bare täte jökrä. <sup>18</sup>Mdakäre abko, meri bti kä ngwarbe turi makwe ye abko nitre nünanka juta kri tä gobrane jrei jökräbti abko turi kore makwe ye, nieba angelekwé tie.

### Ngöbökwe juta Babilonia juani ngwarbe

**18** <sup>1</sup>Yebti angele mda näma kä käinbti jataba timonkwäre ti okwäbti. Angele ye abko bäri di kri abko jataba angwane, trä gitiaba ngwen jökrä kä nebtä, <sup>2</sup>kākwe ñäkäba ja dibti krörö:

¡Juta kri Babilonia nikira ngwarbe!

Üai käme bätäkä ngwarbe, kräke kä nebe nete amne, nukwä bätäkä ngwarbe, ñakare dbe Ngöbö ngwärekre aibe nebe ja juda mike nete.

Erere arato, jändrän ngwarbe ngwarbe, btä ni mätä aibe kräke kä nebe nete.

<sup>3</sup>Ngöbökwe juta ye juandi ngwarbe kore, ñobtä ñan angwane ni dröbare uba döi kwaka kisete tä ja mike ngite meri bti kä ngwarbe ben, ye kwrere ni kä jökräbti temen namani ja mike ngite nitre nünanka juta yebe.

Angwane meri bti kä ngwarbe ben ja mika ngite,  
 kwrere jire jrei kä jökräbti temen käkwe ja mikani ngite.  
 Erere arato, nitre jändrän rürümoinkä abko namani jändrän bkäne  
 kabre jändrän bäri kuinkuin kwetre ye rürümoinbtä ütiäte ütiäte,  
 niebare angelekwe.

- <sup>4</sup>Yehti ni mdara jire kukwei jaraba kä käinbti tie, käkwe nieba krörö:  
 Mun jen tikwe abko käkwe ñan ja mikadre ngite siba nitre nünanka  
 juta nete kwrere angwane, ja tare nika jatadre kri niaratre rüere  
 arato, ye ngwane munkwe ñan ja tare nikadre arato, abkokäre  
 mun jen tikwe ye nän mento juta ne bäre,
- <sup>5</sup>ñöbtä ñan angwane kukwe käme nuenbare kwetre ye nena kabre  
 Ngöbö ngwärekre kä käinbti angwane, kukwe kämekäme nuenta  
 kwetre, ye abko käinikwitekä ñakare Ngöböbti, aisete Ngöbökw  
 mikadi ja tare nike jötrö.
- <sup>6</sup>Niara käkwe dre nuenbare ni mda rüere, ye kwrere nuen niara rüere  
 arato.  
 Niara käkwe dre nuenbare, yehti ta jändrän nuen bobu btä kukwe  
 käme nuen dokwäre.  
 Erere arato, niarakwe ni mda mikani ja tare nike krübäte, ye abko ni  
 bukata uba döi kwakate kwrere, yehti ta uba döi bäri kwaka bobu  
 mda abko bian ie abko erere makwe mika ja tare nike bobu bti ta.
- <sup>7</sup>Mdakäre abko, niara namani bike kri amne kä namani bäri nuäre  
 kri btä nüne bäri kuin,  
 ye kwrere arato makwe nika janknu amne makwe mika ja tare  
 nike kri.

Meri se tä bike kri, käta töbike krörö:  
 Ñan meri kän kwäräi krütani, kwrere tita nete amne ñan tita ja tare  
 nike, akwa tita tākänintbe kuin nete jreina kwrere, tä nütüre jabtä.

- <sup>8</sup>Ye mdenbtä abko köbötira jire ja tare nika jatadi kri kräke abko  
 krörö:

Ni rabadi krüte kwati krübäte amne  
 ni kwati rabadi müen jiehti amne  
 ni kwati rabadi mrö nike amne kukwadi ñukwäte arato,  
 ñöbtä ñan angwane Ngöbö ni Dänkien di kri käkwe mikadi ja  
 ngie nuen bikabtä kri kore, aisete rakadikä kore btä.

<sup>9</sup>Angwane meri bti kä ngwarbe, ben ja mikata ngite bati bati, ye  
 kwrere jire ja mikani ngite. Jrei kä jökräbti temen käkwe ja mikani ngite  
 amne ja mikani nuäre kwetre ben, ye abko juta rabadi nukwe amne  
 ngübü rabadi tuen neen kukwäne ietre angwane, rabadi müaire, kä  
 rabadi ngrente krikri be jiehti. <sup>10</sup>Akwa nane mikadre ja ngie nuen arato,  
 abtä kä jürä rabadi jrei kä jökräbti temen btäre, aisete rabadi nünaninkä  
 mobe temen, käkwe niedi krörö:

¡Aingwaree, juta kri Babilonia juta di kri abko bobre jakän!

Ye ñobtä amarebti batibe mata ja ngie nuen jötrö dikaro ye, niedi jreikwe.

<sup>11</sup>Mdakäre abko, nitre jändrän rürümoinkä käkwe juta ye müaidi amne rabadi ngrente krikri be arato, ñobtä ñan angwane ni ñan rabadre mda jändrän kökaka ietre aisete. <sup>12</sup>Nitre ye abko nämane oro, plata, jä ütiäte ütiäte amne jändrän jä kwrere kädekata perla rürümoine. Erere arato, dän ütiäte kri kädekata lino amne dän sedare amne dän bä tain drüne amne dän tain rürümoin nämane kwetre nitre nünanka juta yete yeye. Erere arato, kri rä bäne bäne amne marfil sribebare jändränne amne kri kuinkuin sribebare jändrän ütiäte kwrere, bronse amne jiero sribebare jändränne amne jä kuin ütiäte kri kädekata mármol abko rürümoin nämane kwetre ietre. <sup>13</sup>Erere arato, canela amne jändrän rä bäne bäne mikadre ja dokwäte amne kri ngwäri rä bäne kukwadre kädekata incienso amne ñö rä bäne bäne amne kri ngwäri rä bäne kädekata mirra abko rürümoin nämane nitre nünanka juta yete yeye. Erere arato, uba döi, kri olibo köi amne arina kuinkuin, trigo amne nbi, obeja, mdä, kareta jädre mdäye amne ni klabore, ni ye abko ni ütiäte Ngöbökrä, akwa rürümoin nämane jändrän mda mda kwrere nitre jändrän rürümoinkäkwe.

<sup>14</sup>Ni ye käkwe niedi krörö juta yebtä: ¡Kri ngwäkä kuin amne jändrän jökrä mda mda nämane nebe bänänte mun kadate, ye abko ñakare mda makwe! ¡Jändrän kabre makwe, bti mata nüne bä nuäre, ye abko nikanina ngwarbe jökrä makän! niedi kwetre. <sup>15</sup>Nitre jändrän rürümoinkä nämane jändrän rürümoine juta yete abko köböire namani jändrän bkäne kabre, niaratre ye abko btä kä jürä rabadi, aisete rabadi nünaninkä mobe temen, kä rabadi müen amne rabadi ngrente krikri be juta ye jiebti. <sup>16</sup>Angwane rabadi niere krörö:

¡Aingwaree juta kri, ma bobre jakän!

Dän ütiäte kri kädekata lino, ye ma nämane kite jabtä.

Erere arato, dän bä mikibare amne dän bä tain drüne, bti ma nämane ja dätere.

Erere arato, oro amne jä tuäre mda mda ütiäte ütiäte amne perla, bti ma nämane ja dätere.

<sup>17</sup>Angwane batibe jändrän kabre ye nikira ngwarbe jötrö makän, abko rabadi niere.

Mdakäre abko, nitre ru ngwianka amne nitre nänkä rute mrenbti amne ni mda mda ru ngwianka mrenbti abko rabadi mobe temen juta mike ñäräre arato. <sup>18</sup>Angwane juta ye rabadi nukwe abko ngübü jatadi ietre, abtä rabadi ngrente krörö: Juta ütiäte kri ne kwrere tua ñakare jire abko rabadi niere. <sup>19</sup>Rabadi ulire abko bä mikakrä niaratre käkwe dobro mnü kitadi ja dokwäbti amne rabadi müen amne ngrente krikri be, kä rabadi ñäke ja dibti krörö:

¡Aingwaree juta kri, ma bobre jakän!  
 Nitre nünanka ma kanti abko jändrän bkäne kabre, ye köböire nun  
 ru ngwianka mrenbti namani jändrän bkäne kabre arato,  
 akwa batibe Ngöbökwe ma junina ngwarbe jökrä,  
 rabadi niere.

<sup>20</sup> Yebti angele ye abko käkwe nieba mda:

Juta niki ngwarbe se abko kä ngwen nuäre jabtä munkwe kä käinbti  
 yete.

Amne mun juta deme Ngöbökwe ye käkwe kä ngwian nuäre jabtä.  
 Erere arato, mun kukwe kuin Jesubtä ngwianka amne mun Ngöbö  
 kukwei niekä ye käkwe kä ngwian nuäre jabtä,  
 ñobtä ñan angwane Ngöbökwe juta juni ngwarbe, ye abko mun  
 dokwäre juni ngwarbe kwe, aisete munkwe käi ngwian  
 nuäre jabtä, nieba angelekwe.

<sup>21</sup> Yebti angele dite kri käkwe jäkwata kri bäsi krü kri trigo ukwakrä  
 kwrere jire dianba kisete, bti kitaba kwe mrente, käkwe nieba krörö:

Jäkwata kri kiti mrente, se kwrere makwe juta kri Babilonia juandi  
 ngwarbe amne ni mda mda käkwe ñan ma tuadreta jire mda.

<sup>22</sup> Mdakäre abko, arpa, tolero amne drü, ye abko ñan kukwei nuadi jire  
 chi mda ma käite yete.

Erere arato, krü trigo ukwakrä ñan ngö nuadre jire chi mda yete.

<sup>23</sup> Erere arato, ñotra trä ñan tuadreta jire chi kwati yete amne, ni ja  
 mikaka gure käi ngwianta nuäre jabtä yete,

ye kwrere käi ñan ngwiandre nuäre jabtä mda yete, ñobtä ñan  
 angwane nitre jändrän rürümoinkä yete abko namani  
 jändrän bkäne kabre kabre abti namani dite dite.

Erere arato, nitre nünanka juta yete käkwe ni kä keta kabre te  
 ngökani kwrasibti, abtä ja ngie nuadi kore kwe.

<sup>24</sup> Juta yete nitre Ngöbö kukwei niekä abko kämikani.

Erere arato, nitre deme Ngöbökwe kämikani amne ni kä jökräbti  
 temen tödekaka Ngöböbti abko kämikani juta yete, aisete  
 Ngöbökwe mikadi ja ngie nuen kore,

nieba angelekwe juta Babiloniabtä.

### Aleluya niebare kä käinbti Ngöböye

**19** <sup>1</sup> Yebti ni kwati kukwei rababa ruen ja dibti tie, kä rababa niere  
 krörö kä käinbti:

¡Aleluya! Ngöbö nikwe aibe ni diantarikä, aibe ütiäte kri amne di kri.

<sup>2</sup> Ye ñobtä ñan angwane meri bti kä ngwarbe tä ni brare näkwite,  
 ye kwrere jire juta ne nämane ni kwati näkwite kukwe kämekäme  
 jiebti kä jökräbti temen abko kräke Ngöbö tä kukwe ükete  
 kuin era metre.

Amne nitre deme Ngöbökwe kämikani nitre nünanka juta yetekwe,  
ye dokwäre abko Ngöbökwe mirira ja ngie nuen krübäte.

<sup>3</sup>Yebti nieba krörö mda kwetre:

¡Aleluya! Juta ne ngübüe rabadi kärekäre kukwäne, ñobtä ñan  
angwane rabadi nukwe kärekäre aisete.

<sup>4</sup>Angwane nitre unbre unbre ni gre bti nibkä amne jändrän kräbkä  
nämane nüne ye rababa ja okokrä mike nebe dobobtä temen, käkwe  
Ngöbö nämä tākānintbe kürä gobrankräfti ye mike ütiäte jae abko  
rababa niere krörö: ¡Amen! ¡Aleluya! rababa niere.

<sup>5</sup>Ye btäräbe kürä gobrankrä Ngöbökwe kanti ni kukwei rababa, käkwe  
nieba krörö:

¡Ngöbö nikwe ye käikitekä munkwe!

¡Mun ütiäte kri amne mun bobre käta sribire Ngöbökrä, käta Ngöbö  
mike ütiäte jae, ye käkwe Ngöbö nikwe käikitaka! rababa niere.

<sup>6</sup>Yebti ni kwati kukwei rababa ruen tie bäsi ñöta neme betekä jäkwatabtä  
timon ngöta neme kri, ye kwrere jire ni kukwei rababa ruen tie amne, bäsi  
unsuni ngö kri, ye kwrere ni kukwei rababa ruen tie, kä rababa niere:

¡Aleluya!

¡Ngöbö ni Dänkien Di Kri Jändrän Jökrä Nuenkrä kitera gobrane!  
rababa niere.

<sup>7-8</sup>Ni Kordero kwrere kitera ja mike gure amne meri bati abko käkwe  
ja dātenirira rabakäre ben abko ie dān kuin lino trä ngitiekä bini  
kitakrä jabtä ja mikakäre gure.

Ne aisete ari kä ngwen nuäre jabtä amne ari kä ngwen juto jabtä  
amne ari niara käikitekä.

Nitre deme jen Ngöbökwe käkwe sribi kuin era metre nuenbare  
Ngöbökrä.

Sribi kuin era metre, ye abko dān kuin lino abko bä mikata kore.

<sup>9</sup>Yebti angelekwie nieba mda tie:

Kukwe tike krörö täräbtä: Ni Kordero kwrere käkwe ja miri gure, ye  
kanti nire nire tä nübaibare, ye abko btä kä raba nuäre kri krübäte, nieba  
kwe tie.

Abti jötrö nieba krörö mda kwe:

Tikwe kukwe nini, ye abko Ngöbö Kukwei era metre, erere tikwe nini  
mae, nieba kwe tie.

<sup>10</sup>Angwane ti rikaba ngitiekä ngukudokwäbti temen angele ye  
ngotobtä mikakäre ütiäte jae, akwa angele ye käkwe nieba tie:

Ma amne ma mräkä mda mda käta nünenkä dite jabtä kukwe era metre  
Jesukwe btä, käta sribire Jesukrä, ye kwrere tita sribire arato, aisete  
makwe Ngöbö aibe mika ütiäte jae, ñobtä ñan angwane nitre Ngöbö  
kukwei niekä era metre, ye mden abko nämāne blite Jesubtä, nieba  
angelekwie tie.

### Jesu jatani mdä bä ngwenbti

<sup>11</sup>Angwane kä käinbti gitiaba sete, rababa tuen tie amne mdä bä ngwen näma krati. Mdä yebti ni näma näin iti abko kädian näma Ni Ja Kukwei Mikaka Täte amne Ni Era Metre. Niara näma kukwe ükete metre ta ni jökrä kräke amne kukwe era metre dokwäre näma rüre Ngöbö rüebe. <sup>12</sup>Angwane niara okwä abko rababa tuen trä ngitiekä ñukwä jutra kwrere tie jändrän jökrä gare ie bä mikakrä amne, dokwäbti abko korona näma kabre kabre, niara abko gobran kri bä mikakrä amne, niara kä näma tikani mda ye abko niara aibe ie näma gare kaibe. <sup>13</sup>Mdakäre abko, dän jükani därire jökrä näma kitani jabtä kwe niara krütani ni diantarikäre bä mikakrä amne, niara kädian näma Ngöbö Kukwei arato. <sup>14</sup>Niara ye jiebti abko nitre rükä kä käinbti näma näin kwati krübäte abko dän ngwen lino näma kitani jabtä. Dän lino ye abko ütiäte amne merebe amne, niaratre näma näin mdä ngwen ngwenbti. <sup>15</sup>Niara rababa ñäke angwane, bäsi ngitra tu grine jabtä kwärikwäri, ye kwrere jire kukwe rababa betekä kadate nitre kä jökräbti temen nünanka Ngöbö rüere kämikakäre. Erere arato, “mökän jierore ni kämikakäre, bti niarakwe gobrandi tare,” amne bäsi uba tükakata ngotobti amne ñöi aibe diankata, ye kwrere jire niarakwe rätädi Ngöbö rüebti, yebti abko Ngöbö Di Kri Jändrän Jökrä Nuenkrä, Ngöbö ye abko mätä kri krübäte abko bä mikata kore kwe. <sup>16</sup>Dänbtä ie amne uliebtä abko niara kä näma tikani mda abko krörö: JREI BÄRI KRI JREI MDA MDA KRÄKE AMNE DÄNKIEN BÄRI KRI DÄNKIEN MDA MDA KRÄKE abko näma tikani kore btä.

<sup>17</sup>Yebti ti okwä rababa angelebtä angwane, angele ye rababa nünaninkä ñänänbti angwane, nukwä jökrä ngri kwetakakwetaka jüden kwrere tä nikenkä käinta, ie angele ye rababa ñäke krikri ja dibti krörö mda: Ngöbö kite mrö sribere kri krübäte mun bukakrä, aiseite mun jakwe ja ükekrö jökrä mröre. <sup>18</sup>Angwane munkwe jrei ngrie kwetadre, munkwe nitre rükä dänkien ngrie kwetadre, munkwe nitre rükä baliente baliente ngrie kwetadre, munkwe mdä rükrä ngrie kwetadre, munkwe nitre nänkä mdäbti rübtä ngrie kwetadre. Erere arato, munkwe ni jökrä ngrie kwetadre abko ni ñakare klabore, ni klabore, ni bobre amne ni ütiäte kri ngrie kwetadre munkwe, aiseite jakwe, nieba angelekwä nukwäye.

<sup>19</sup>Angwane ni jändrän kri krübäte kwrere ye käkwe rükä kwekwe amne jrei kä jökräbti mikabara biare rükäre ni nänkä mdä ngwenbti ye rüere amne rükä kwekwe rüere arato. Nikani rüre, <sup>20</sup>akwa ni jändrän kri krübäte kwrere ye kaba ngite amne ni ngöbö ngwarbe ngwarbe kukwei niekä käkwe sribi kri ñan tuabare nuenbare abko kaba ngite arato. Ni ngöbö ngwarbe kukwei niekä käkwe sribi kri ñan tuabare nuenbare, yebti abko ni kwati ngökani kwe amne, nitre yebtä abko ni jändrän kri krübäte

kwrere ye kä tikani. Erere arato, ni jändrän kri krübäte abko bä sribebare ngöbö ngwarbere abko mikani ütiäte kwetre, yebtä abko ni jändrän kri krübäte kwrere btä ni ngöbö ngwarbe kukwei niekä kaba ngite, ye abko ñukwä jutra ngitiekä asufrebe, ye te kitaba nire jökrä ja tare nikakäre. <sup>21</sup>Angwane ni mda mda nämane rüre Jesukristo rüre abko Jesukristo nämä näin mdäbti ye käkwe kämikaba jökrä ja kukwei aibehti, ñobtä ñan angwane niara kukwei abko rababa betekä ngitra tu kwrere, aiseite ni kämikaba jökrä kwe. Angwane nukwä ngri kwetakakwetaka jüden kwrere käkwe nitre ye ngrie kwetaba trinetrine jökrä.

### Kä mili krati

**20** <sup>1</sup>Yebti angele nämä iti kä käinbti, jataba timonkwäre ti okwäbti. Angele ye abko nämä näin llabe jukwe Kä Timonbti ngwena kisete amne kadena kri ngwian nämä kisete kwe arato. <sup>2</sup>Angele ye abko käkwe mökata kaba ngite. Mökata ye abko tbi nämäne kira, arabe abko kädianta Diablu amne Satana arato. Mökata ye abko angelekwe mäkäteba kadenanbti kä mili krati, <sup>3</sup>käkwe kitaba ngite Kä Timonbti, bti jukwe dikaba kuin bti kwe, bti Ngöbö kä tikani jukwebtä, ni mdakwe ñan tikadre abkokäre. Niara ñan rikadreta nitre ngököta kä jökräbti temen, abkokäre kä mili krati ngämi niken ta niara ñan tikaditeta. Akwa yebti mökata ye tikaditeta bä jötrö.

<sup>4</sup>Yebti kürä gobrankrä nämä kabre kä käinbti btä ti okwä rababa. Kürä yebti abko nitre ie ja di biani Ngöbökwé kukwe ükatekäre nikrä abko nämä tākänintbe, tikwe tuaba. Erere arato, nitre käkwe ja tare nikani blitabtä Jesubtä amne kukwe kuin Ngöbökwé Jesubtä mikabtä gare ni mda mdaye, akwa nünankabare dite jabtä kwetre, käkwe Jesu rükaninte ñakare abko dokwäre dokwä tikaninkä, ye abko üai nämä siba yete. Mdakäre abko nitre ye käkwe ni jändrän kri krübäte kwrere ye mikani ñakare ngöböre jae amne niara bä mikani ñakare ütiäte jae ngöbö kwrere. Erere arato, nitre ye okobtä o kisebtä abko ni jändrän kri krübäte kwrere ye kä tikani ñakare abko üai tuaba tikwe. Niaratre ye abko rükabata nire jökrä, käkwe gobranba kä mili krati Kristobe gwaire tikwe tuaba. <sup>5</sup>Ni ruäre mikabata nire käne kore Ngöbökwé, akwa ni mda mda abko mikadita nire ñakare kwe abti kä rikaba mili krati ta. <sup>6</sup>Nitre rükabata nire kore, ye abko deme amne ni yebtä kä rabadi nuäre kri. Niaratre ñan krütadre mda, ye abko Ngöbökwé ñan mikadi ja ngie nuen akwa, nünandi kärekäre kwetre Ngöböbe angwane, ni blitaka Ngöböbe ni mda mda diäre tä sribire, ye kwrere sribidi kwetre Ngöbökrä amne Kristokrä amne gobrandi kä mili krati kwetre ben gwaire arato.

### Ngöbökwé Satana juani ngwarbe mrä

<sup>7</sup>Yebti kä mili krati rikadi ta angwane, Satana tä ngite Kä Timonbti abko tikadite angwane, <sup>8</sup>näin ni ngökö kä jökräbti temen nebebe kä



ñäre jökrä amne kākā Gog amne Magog angwane, ni ükadikrö kwati kwe rükäre Ngöbö rüere. Ye abko, mren ümain kwrere jire ni rabadi ja ükaninkrö rükäre Ngöbö rüere. <sup>9</sup>Angwane nitre rükä kwati ye rikaba mobe kākwe ja ükäröba jökrä juta deme Ngöbökwē bäre temen amne juta Jerusalén tarebare Ngöbökwē ye bäre temen, ni ye juankäre ngwarbe, akwa batibe ñukwä kä käinbti jataba timonkwäre kākwe ganinkä jökrä se kwrere. <sup>10</sup>Angwane diablu nämāne niaratre ngökö, ye abko ñukwä jutra ngitiekä asufrebe mni mni te kitaba. Kä ye arabe kanti ni jändrän kri krübäte kwrere kitanina käne amne ni ngöbö ngwarbe kukwei niekä kitanina arato, ye kanti diablu kitaba. Kä ye kanti mikadi ja tare nike kärekäre dibire rare.

### Ngöbökwē kukwe ükaninte ni krütanikrütani kräke

<sup>11</sup>Yebti kürä gobrankrä kri, ngwen bürere tuaba mda tikwe. Kürä yebti abko ni nämā tākānintbe iti. Niara ngwärekri abko kä temen ne amne kä käinta se gitiaba batibe jökrä abko ñān tuaba jire chi mda tikwe. <sup>12-13</sup>Angwane nitre müre neketani mrente, ye erere nükaninta nire jökrä. Erere arato, ni müre ketaniketani abko üai nämāne kä nakebtä, ye erere nükaninta nire jökrä arato, aisete nitre ütiäte krikri ya, o bobre bobre ya, krütanikrütani abko nämā nünāninkä jökrä kürä gobrankrä Ngöbökwē ye ngwärekri, btä ti okwä rababa. Ye btäräbe tärä metateba keteti. Erere arato, tärä ni nünānka kärekäre Ngöböbe mikakrä gare abko metateba arato. Angwane ni itire itire ngämi krüte, känenkri dre dre nuenbare kwetre, ye erere btä Ngöbökwē kukwe ükateba kräke, aisete ni itire itire kākwe dre dre nuenbare nämā tikani täräbtä, ye erere kukwe ükateba kräke Ngöbökwē. <sup>14</sup>Yebti gata ara amne kä nakebtä kitaba ñukwä jutrate kä Timonbti juankäre ngwarbe. Ñukwä jutra kä Timonbti ne kanti abko nita krüte bobukäre. <sup>15</sup>Tärä ni nünānka kärekäre Ngöböbe mikakrä gare, tärä yebtä nire nire kä kwani ñakare, ye erere kitani jökrä ñukwä jutrate ja tare nikakäre kärekäre.

### Juta Jerusalén btin

**21** <sup>1</sup>Yebti kä käinta btin amne kä temen ne btin tikwe tuaba mda, ñobtä ñān angwane kä käinta se btä kä temen ne amne mren dätebare käne Ngöbökwē abko nikanina ta, aisete ñān rababa jire mda. <sup>2</sup>Yebti juta Jerusalén btin kuin deme nämā Ngöbö kanti kä käinbti abko jataba timonkwäre tikwe tuaba bäsi meri tä ja ükaninte kuin bä nüäre brare ngäbti ja mikakäre gure ben, ye kwrere jire juta ye rababa tuen tie. <sup>3</sup>Angwane btäräbe kürä gobrankrä Ngöbökwē tuaba tikwe, ye kanti ni kukwei jaraba kri tie, kä rababa niere krörö:

Mtare Ngöböta nüne ni jen kwe ben juta btin nete. Ngöbökwē nünāndi bentre amne niaratre rabadi juta jen Ngöbökwē, aisete Ngöbö ara jire

tädi bentre Ngöbö jen kwetre kwrere. <sup>4</sup>Angwane Ngöbökwé niaratre okwä ñöi sökadite jökrä ietre amne ni ñan krütadre jire iti mda amne ñan ja müaidre jire chi mda amne ñan ja müaidre ja tare nikabtä, ñöbtä ñan angwane kukwe nämane ükaninte ño känekäne, erere nikanina jökrä ta. <sup>5</sup>Angwane Ngöbö nämä takänintbe kürä gobranksräbti ye käkwe nieba krörö:

Jändrän jökrä tita sribereta btin, nieba kwe.

Bti niebata kwe tie:

Kukwe ne abko kukwe era metre, abtä ni jökrä rabadre tödeke bti, aisete tike tärbtä, nieba kwe tie.

<sup>6</sup>Yebti Ngöbökwé nieba krörö tie:

Jändrän jökrä nibira bare. Ti abko tärä okwä kena kädianta alfa amne tärä okwä mrä kädianta omega kwrere. Ti nämanena jändrän jökrä känenkri kena amne ti rabadi jändrän jökrä täbti mrä. Mdakäre abko, nire nire ie tomna ye abko ie tikwe ñö okwä kuin nire käta ni mike nüne kärekäre ye biandi ngwarbe tomnane. <sup>7</sup>Mdakäre abko, nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere abko ie tikwe jändrän kuinkuin jökrä ne biandi amne, ti rabadi Ngöböre kwetre amne niara rabadi ti ngäbriänkä tikwe. <sup>8</sup>Akwa ni käta ja ngwen ngwarbe amne ni tödeke ñakare Jesubti, akwa tä niara rükente, amne ni ñan tö Ngöbö Kukwei mikai era jae, erere arato ni ngututu diän diän, ni ni mda mda kämikaka amne ni ja mikaka gure tiebetiebe amne ni kwrarekwrare, amne ni sukiare sukiare, amne ni jändrän ngwarbe mikaka ngöböre jae amne ni ni ngökaka, ye abko ñukwä jutra ngitiekä asufrebe mni mni abko te kitadi. Ye kanti krütadi bobukäre. <sup>9</sup>Yebti angele ni kükü kisete blato nämä abko te Ngöbö mätä kri nämä iandrete, angele ye abko jataba iti, käkwe nieba mda tie:

Meri ben ni Kordero kwrere rabai, meri ye abko ti bike mike tuare mae. Jakwe tuen, nieba kwe tie.

<sup>10</sup>Yebti Ngöbö Üaikwe ti mikani jändrän tuen köböre kwrere angwane, ngitio kri mobe käin, kanti angele rikaba ti ngwena, käkwe juta Jerusalén deme nämä kä käinbti Ngöbö kanti abko jataba timonkwäre, tikwe tuaba. <sup>11</sup>Juta ye abko Ngöbö trä bä nuäre abko bti rababa trä ngitiekä amne bäsi jä tuäre ütiäte kri kädekata jaspe, kwrere jire juta ye rababa trä ngitiekä. <sup>12</sup>Angwane juta ye bäre temen abko ki nämä mikani kri amne mobe käin. Ki yebtä abko jukwe nämä kwä jätäbti kubu amne jukwe kwatirekwatire btä angele nämä nünaninkä iti ngibiare. Erere arato, Jacob ngäbriänkä ni jätäbti nibu abko kä nämä tikani itire itire jukwe kwatirekwatire btä. <sup>13</sup>Jukwe ye abko nämä kwä jätäbti kubu: komä kä dririkri, komä ngwitäräkri, komä mötarikri amne komä nindrinikri. <sup>14</sup>Amne ki mikani jutabti, ye abko jä nämä mikani kwä jätäbti kubu gräre. Jä yebtä abko nitre Jesu kukwei ngwianka ni jätäbti nibu kä nämä tikani.

<sup>15</sup> Angwane angele nāma blite tibe ye nāma nōrā orore ngwena krati kisete juta ñākākrā, jukwe ñākākrā amne ki jutabti ñākākrā arato. <sup>16</sup> Juta ye abko ja nāre jōkrā kwārikwāri, aisete kōrā ja nāre kwārikwāri. Angeleke juta ye ñākāba nōrā yebti angwane, rababa 2,200 kilometro ja nāre kōrā ngakri, kwatakri amne kukwāne rababa ja nāre jōkrā. <sup>17</sup> Yebti ki nāma jutabti, ye ñākāba kwe arato angwane, ki ye abko rababa 65 metro ie, ye abko ni kā nebtā tā jāndrān ñāke ño, ye kwrere angele nāma juta ye ñāke. <sup>18</sup> Amne ki nāma mikani juta yebti abko jā kuin ūtiāte kri kādekata jaspe nāma mikani kire, akwa juta ara jire abko oro kuin trā ngitiekā bidrio kwrere. <sup>19</sup> Angwane jā kwā jātābti kubu mikani ki grāre abko btā jā tuāretuāre ūtiāte kri bātākā ngwarbe nāma mikani abko krōrō: jā kāne btā abko jā kuin ūtiāte kri kādekata jaspe nāma mikani, jā kubukāre abko btā jā kādekata zafiro nāma mikani, jā komākāre abko btā jā kādekata ágata nāma mikani, jā kobkākāre abko btā jā kādekata esmeralda nāma mikani amne <sup>20</sup> jā kwārikekāre abko btā jā kādekata ónice nāma mikani, jā kwā tikāre abko btā jā kādekata cornalina nāma mikani, jā kwā kükükāre abko btā jā kādekata crisólito nāma mikani, jā kwā kwākāre abko btā jā kādekata berilo nāma mikani amne jā kwā ökānkāre abko btā jā kādekata topacio nāma mikani, jā kwā jātākāre abko btā jā kādekata crisopraso nāma mikani amne jā kwā jātābti kwatikāre abko btā jā kādekata jacinto nāma mikani amne jā kwā jātābti kubukāre abko btā jā kādekata amatista nāma mikani.

<sup>21</sup> Angwane jukwe kwā jātābti kubu juta yebtā abko perla aibe mikani jukwere, aisete jukwe kwatirekwatire abko perla kwatibe nāma mikani jukwere amne ji juta ye ngātāite ta abko oro kuin ara jire mikani jire amne nāma trā ngitiekā bidrio kwrere jire abko tikwe tuaba.

<sup>22</sup> Mdakāre abko, ju blitakrā Ngōböbe tikwe tuaba ñakare juta Jerusalén btin yete, ñobtā ñan angwane ni Dānkien Ngōbö Di Kri Jāndrān Jōkrā Nuenkrā abko tā yete amne ni Kordero kwrere tā yete abko ben ni raba blite gwārere, aisete ju blitakrā Ngōböbe ñakare yete. <sup>23</sup> Erere arato, ñānā amne sō trā rabadre juta yete abko ñakare ūtiāte, ñobtā ñan angwane Ngōbö trā kuin bā nuāre ye abko tādi juta yete amne ni Kordero kwrere abko tā ñotrare yete arato. <sup>24</sup> Ye abko nitre nūnanka kā jōkrābti temen abko kākwe dikadikā ñotra ye trāte nebebe juta Jerusalén btin ye kānti amne nitre jreire kā jōkrābti temen abko kākwe jāndrān ūtiāte kwekwe biandi Ngōböye niara mikakāre ūtiāte jae juta yete. <sup>25</sup> Angwane jukwe juta yete abko ñan dikadre jire chi rare amne juta ye kānti kā ñan rabadre iko arato, aisete jukwe ñan dikadre jire chi. <sup>26</sup> Erere arato, nitre nūnanka kā jōkrābti temen abko jatadi jāndrān ūtiāte ūtiāte kwekwe ngwena biandre Ngōböye niara mikakāre ūtiāte jae juta yete. <sup>27</sup> Akwa jāndrān kāmekāme ñan rikadi jire chi nebe juta yete amne, ni diān diān amne ni ni ngōkaka ñan rikadi jire chi yete arato; akwa nire

nire kākwe nūnandre kākerekäre Ngöböbe abko käta tikani tärä ni Kordero kwrere yebtä, ni ye aibe abko rikadi nüne juta yete abko angelekwe mikani tuare tie.

### Ñö kri ni mikakrä nire kākerekäre

**22** <sup>1</sup>Yebti ñö kri kuin dirare angelekwe mikaba tuare tie. Ñö ye abko ni mikakrä nüne kākerekäre amne ñö ye abko kuin merebe jä cristal bä merebe ye kwrere. Erere arato, kürä gobrankrä Ngöbökwé amne kürä gobrankrä ni Kordero kwrere kwe, ye kánti ñö ye nämá neen. <sup>2</sup>Angwane ji kri juta yete abko ötöbu ta ñö ye tä neen amne kri ni mikakrä nüne kākerekäre nämá niren ñöbtä kwäríkwári. Kri ye abko ngwá námá nebe sö kratirekratire, aiseite kri ye ngwá námá nebe bá jätäbti bobu btä kä kwatirekwatire amne kri ye abko kä námá ni jökrä mikakrä kuinta. <sup>3</sup>Mdakäre abko, juta Jerusalén btin yete abko jändrän btä ngürün mikani Ngöbökwé abko ñan rabadi jire chi. Angwane kürä gobrankrä Ngöbökwé amne kürä gobrankrä ni Kordero kwrerekwe abko tädi juta yete, aiseite nitre sribikä kwekwe abko erere kākwe niaratre káikitadikä kākerekäre. <sup>4</sup>Angwane niaratre jökrä kākwe ja tuadi gwärere Ngöböbe, kä näin niaratre kä ngwena tikani ja oköbtä, niaratre abko ni jen Ngöbökwé bá mikakrä. <sup>5</sup>Juta yete abko kä ñan rabadre iko jire chi, aiseite nitre nünanka juta yete, kräke ñotra ñan rabadre ütiäte. Erere arato, ñänä trä ñan rabadre ütiäte kräke, ñöbtä ñan angwane Ngöbö ni Dänkien ara jire kākwe kä trä biandi nitre nünanka yete ie. Niaratre kākwe gobrandi kākerekäre.

<sup>6</sup>Yebti angelekwe nieba mda tie:

Kukwe nieta tikwe mae, ne abko era amne kukwe kuin tödekakrä. Ye abko, ni Dänkien Ngöbö ara jire käta nitre niara kukwei niekä töi tike ja kukwei niere, Ngöbö ye ara kākwe angele kwe juani abko kukwe mden mden rakadikä bá jötrö mikakäre tuare sribikä kwekwe ie, nieba kwe tie.

### Jesu jatadita

<sup>7</sup>Angwane ni Dänkien Jesu abko kākwe nieba mda tie:

¡Ti rükadita jötrö! Kukwe biani Ngöbökwé nitre Ngöbö kukwei niekä köböire tä tikani tärä nebtä, ye nire nire tä mike era jae, yebtä abko kä rabadi nuäre amne Ngöbökwé ja di biandi ie, nieba kwe tie.

<sup>8</sup>Angwane ti Juan, ti ne abko kākwe kukwe ne tuaba amne tikwe kukwe nuaba arato. Tikwe kukwe tuaba amne tikwe kukwe nuaba ünän jökrä, ye btäräbe angele kākwe kukwe mikaba tuare tie, ye ngotöbtä ti rikaba ngitiekä ngukudökwäbti temen mikakäre ütiäte jae. <sup>9</sup>Akwa angele ye kākwe nieba mda tie:

Ma mräkä mda mda käta kukwe tä tikani tärä nebtä mikaka täte ye käta sribire Ngöbökrä, ye kwrere tita sribire arato, aiseite makwe ñan ti mika ütiäte jae, akwa Ngöbö aibe makwe mika ütiäte jae, nieba kwe tie.

<sup>10</sup>Erere arato, angeleklewe nieba krörö mda tie:

Ngöbö Kukwei biani niedre mae abko tä tikani tärä nebtä, ye abko kebera nebe bare, aiseite makwe ñan üka kaibe tiebe, akwa makwe mika gare ni mda mdaye. <sup>11</sup>Angwane kä kitera neme braibe ja töi kwitakrä nie, aiseite nire nire käta kukwe kämekäme nuene Ngöbö rüere, ye tuametre nuene janknu amne, nire nire käta kukwe diän diän nuene, ye tuametre nuene janknu; akwa nire nire käta jändrän kuinkuin nuene ye käkwe jändrän kuin nuen janknu Ngöbökrä. Erere arato, nire nire käta nüne deme amne metre, ye käkwe nüna deme janknu Ngöbökrä, nieba angeleklewe tie.

<sup>12</sup>Angwane ni Dänkien Jesukristo käkwe niebata tie:

¡Ti rükadita jötrö! Akwa ni itire itire tä dre dre nuene, ye abko ti jatadi ütiä ngwena kräke amne, <sup>13</sup>ti abko tärä okwä kena kädianta alfa amne tärä okwä mrä kädianta omega. Ti nämanena jändrän jökrä känenkri kena amne ti rabadi jändrän jökrä täbti mrä.

<sup>14</sup>Mdakäre abko, dän bätäteta tä nebe ngwen büre, ye kwrere nire nire käkwe tödekadre tibti rabakäre merebe Ngöbö ngwärekre abko rabadi nebe kri ni mikakrä nüne kärekäre kánti amne juta Jerusalén btin, ye kánti rabadi niken amne ni ye abko btä kä rabadi nuäre. <sup>15</sup>Akwa ni ngututu diän diän, ni kwrarekwrare, ni sukiare sukiare, ni ja mikaka gure bati bati, ni ni mda mda kämikaka, ni jändrän ngwarbe mikaka ngöböre jae amne ni jökrä käta ni ngöka tarere amne tä käi ngwen nuäre jabtä ni ngökakäre, nitre korekore abko rabadi jökrä Ngöbö okwä bäre mento.

<sup>16</sup>Ti Jesu, ti ne mden käkwe angele tikwe juani kukwe ne mike gare jökrä mae abko erere makwe mikadre gare nitre gätäkä ti käbti yeye. Ti abko Jrei David bkün amne ti abko Muke Trä Dirare Dekä kwrere, nieba Jesukwe tie.

<sup>17</sup>Ye abko, Ngöbö Üai Deme amne ni Kordero kwrere nän muko käta ¡Jakwe! niere Jesuye amne, nire nire tä ti kukwei nuen käkwe ¡Jakwe! nie Jesuye arato. Mdakäre abko, nire nire ie tomna abko tö tomna ñain nünakäre kärekäre, ye abko jata Jesuye, käkwe ñö ni mikakrä nüne kärekäre ye ña ngwarbe tomnane.

<sup>18</sup>Angwane Ngöbö Kukwei niebare tä tikani tärä nebtä, ye nire nire tä kukwe nuen ye abko ie ti bike niere krörö: Kukwe tä tikani tärä nebtä, nebti ta nire nire käkwe kukwe mdara jire tikadi, ye dokwäre abko kukwe taretare tä tikani tärä nebtä abko bti Ngöbökwé mikadi ja tare nike kri krübäte. <sup>19</sup>Angwane kukwe tä tikani tärä nebtä, ne nire nire käkwe diandrekä ruäre, yehtë abko kri ni mikakrä nüne kärekäre, ye Ngöbökwé diandikä kän amne kri ye ngwäkä ñan kwetadre kwe, aiseite ñan nünandi kärekäre kwe Ngöböbe. Erere arato, juta deme Jerusalén ye Ngöbökwé diandikä kän, aiseite ñan nünandi kwe yete.

<sup>20</sup>Ti Jesu käta kukwe tikani tära nebtä niere metre, käta niere krörö:  
¡Ti näinta jötrö kä temenbtä! abko tita niere.

Ti Juan, ti ne abko käta niere krörö ni Dänkien Jesuye: ¡Amen!  
¡Jakweta ti Dänkien Jesu! tita niere Jesuye.

<sup>21</sup>Ni Dänkien Jesu käkwe ja moto mika kuin ni jen Ngöbökwé kräke  
abko ie ti tö. Amen. Abko kore se. Ne ngöra.